

المحاكمة

مسرحية في قسمين


تأليف
يسرى الجندى



الموسسة الوطنية للمكتبات والارشيف

١٩٩٠

بسم الله الرحمن الرحيم



الافراج الفنل : اسامة سعفء

إهداء

الى والدى ٠٠ وائل وجاسر

القسم الاول • • •

- المسرح مستويين • القمر يضيئه بالعمق •
- بالمستوى العلوى القرية ، بالمستوى السفلى مقابر
دنشواى ، تظهر أربعة قبور متقاربة دون نظام •
صخر ونباتات ••
- نقيق ضفادع وعواء كلب ينقطع •
- يختفى القمر خلف غمامة فيغرق المسرح فى الظلمة •
- ويسمع على الفور أرغول ودقات دفوف خافتة وغناء
عن بعد •• يخفت ذلك تماما ليدخل من اليسار
الراوى يحمل مصباحا يتحرك بين القبور ثم يهبط الى
الوسط من المقدمة •

الراوى : الاسم فى محاضر التحقيق •

صوت : (قوى كأنه لحاجب محكمة) المتهم حسن على
محفوظ •

(يظهر شبح رجل بأقصى الخلف من المستوى العلوى)

الراوى : (مشيرا الى القبر الأول من اليمين) ودى تربته .. كان أولهم .. عجوز بسبعين سنة .. ورجله كانت ثابتة لما طلع للموت ..

(تعلقو دقات الدفوف)

الراوى : (مشيرا الى القبر الثانى) والثانى كان .. وحيد وصاحب ناي .. والاسم فى محاضر التحقيق . الصوت : (يعلن) المتهم يوسف حسن سليم .

(تعلقو دقات الدفوف ويظهر بالخلف شبح رجل آخر)

الراوى : (مشيرا الى القبر الثالث) وده تالتهم .. شيال حمول .

الصوت : (يعلن) المتهم السيد عيسى سالم .

(تعلقو دقات الدفوف ويظهر بالخلف شبح رجل ثالث)

الراوى : والرابع كان زهران .

الصوت : (يعلن) المتهم محمد درويش زهران ..

(تعلقو الدقات ويظهر بالخلف شبح رجل رابع)

الراوى : الوحيد الى الناس فاكرينه .. وعنه تتغنى
غناوى .. الغناوى تقول بطل .. وهمه قالوا فى
محاضر التحقيق حرامى .. هوه بطل ولا حرامى
(يتحرك للخلف) الى قصادنا الوقت هيه الترب ..
وياها سبعين سنة فاتو ..

(يتابع الحركة فى الوقت الذى يبدأ فيه
الرجال بالخلف فى الهبوط ببطء شديد نحو
المستوى السفلى كل منهم بيده عصا قوية
يدق بها مع خطواته)

الراوى : آدى الترب .. وهناك قصادها البلد .. الناس
وأجران الحمام والأرض .. وبيوتها والجامع
(صمت .. يتحرك الى أعلى)

نفس الأرض ونفس الناس .. وكأن العالم
ما اتعزى ليها فى يوم .. تزرع وتربى حمام ..
تطلع ع السوق .. تصحى وتنام م المغرب ..
وتقوم فى الفجر .. والساقية تدور زى العادة
.. طيبة وعصبية وضيق .. وحكاوى متكررة
بين المخاليق .. ويقولوا أخرتها .. أهى عيشة ولقمة
وموتة .. لكن أبدا .. مش هيه .. دى غميقة
ولها أسرار .. أسرار الملكوت والأرض .. وعفيه
فى عشق النور والشمس وريحة الطين الحى ..
وعنيدة قصاد الموت .. دايمًا تعانده من زمان ..

وبكل لون .. وماتعرفش ازاي .. على قد الأحياء
فيها ماهماش أحياء .. تلقى الأموات فيها
ماهماش أموات .. علشان كده .. يوم الحادثة
مافتش .. ولاحدش منهم مات .. لساهم فيها
ساكنين .. فى لون خضار الزرع بيطلو .. وفى
عيون الولاد .. وفى سر بيحضنه لبكره نسيم
الليل .

(ترتفع الدفوف .. يكون الأربعة قد وصلوا
الى المقابر كل يمسك عصاته منتصباً ..
والراوى أصبح بأعلى)

الراوى : والبعض بيحكى ان معادهم ده ..
(ثلاث دقائق قوية)

فى كل عام يتجمعوا دايماً فى نفس اليوم (صمت)
بعد ما الليل يحضن ع الجميع .. وتنام هناك
دنشواى .. من حضن تلج الموت بيصحوا .. على
أدان غير الأدان .. أدان دافى غريب مجهول (يبدأ
فى الانسحاب الى يمين المستوى الأعلى) ما يعرف
السر الا الزرع .. وغناوى الجدود .. ومن عرف
طعم الشهادة .

(يكون قد اختفى . تتحرك الغمامة من فوق
القمر .. فيسقط الضوء عليهم . يجلس

كل منهم فوق قبره وهو يلتف برداء واسع
أبيض يضمه على جسمه بيد ويمسك عصاته
باليد الأخرى • ينظرون الى بعضهم فى
اثناس •• ضوء القمر يميل الى الزرقة)

محفوظ : (أكبرهم • يضرب بعصاه الأرض فى
هدوء) سلامات ياولاد ••

يوسف : سلامات يا ابو محفوظ ••

الجميع : (معا) سلامات ••

(صمت • يدق محفوظ الأرض وحده بعصاته
فى تتابع)

محفوظ : اتلميتو ••

يوسف : من تانى وف نفس المعاد ••

الجميع : نفس المعاد ••

سيد : كثير بقالنا الوقت ••

يوسف : سنين دارت ••

محفوظ : بتلف وييجى اليوم ونتجمع •

زهران : وهيه ممددة ونايمه •

محفوظ : بعد الشقا نايمه كما العادة دنشواى ••

سيد : والحمام نايم •

الجميع : (معا • فى حنين) الحمام ••
محفوظ : الحمام وصوت يوسف (ليوسف) صوتك
يا يوسف كان عفى ••
يوسف : (بتنغيم بطيء وتوقيع بمصاه)
« ماتطنش الطنادى يا دبان »
« دنا كان أبويا زينة الجدعان »
« كان ليه قصر حيطانه م البنور »
« لكن السنين دايم تلف تدور •• تدور »
(موسيقى)
(يضحك) ولا كان لى أب ولا حيطان بنور ••
مقطوع من شجرة ضايح •• كل اللى حيلتى الحب
•• والحب يا با قيمته ايه •• وارجع وأقول ••
كان كفاهه رغم ده •• نظرة عندها السود ••
صوت : (فتاة - يصدر من أعلى) يوسف يا طيب ••
ليه الزمان وياك كده ؟
يوسف : تسألنى كانت •• ليه الزمان وياك كده •
ماستنتش الرد يا نرجس •• المحكمة وفرت الرد
علينا والموت ••
المجموعة : (معا) المحكمة والموت (صمت) •
سيد : لكن يا يوسف •• لساك حاسس بده الحب اللى
سقمك وقتها •

محفوظ : الحب ياسيد .. ما انت عارف وكلنا عارفين
.. ايه بنحسه الوقت قصاد الدنيا الى فارقنا هنا .
مافضلش غير الشفقة على الى فى ساقيتها دايرين
.. مساكين .. مغاليق الدنيا دى مساكين ..
الواحد دلوقت يبص لدنياهم ويتعجب .. شقا وكدر
.. ودواير بتلف تلف .. وياها يلف ويتكرر ..
الكبر وظلم المتجبر .. والنغمة الكدابة واللؤم ..
والضعف المر .. والنهب أشكال .. وكلاب أشكال
.. وتلف تلف .. آخرتها فى لحظة نقول توتة ..
فرغت خلاص الحدوتة .. ونموت .. ايه يفضل
بعدها غير الشفقة ع الى هناك لسه ؟؟

زهران : (بحسم) لأ .. أنا حاسس شىء تانى بالنسبة
لهم يا ابو محفوظ .

محفوظ : حاسس ايه تانى يا زهران ..

زهران : مش عارف بالضبط ..

سيد : ما خلاص انقطع الحبل ..

زهران : امال ليه احنا بنتجمع دايم نفس اليوم .

محفوظ : لاجل ما نتذكر يا اولاد .. يمكن .

زهران : لأ يا ابو محفوظ .. لازم فيه شىء تانى بيجمعنا
فى نفس اليوم ..

محفوظ : ايه هو بس يا زهران ؟ (صمت)

سيد : نفتكر أحسن زى العادة .

(صمت . يدقون بعصيتهم الأرض معا فى رتابة وكل منهم يحملق أمامه . . تتصاعد تدريجيا أصوات متداخلة . . طلقات نارية . . وميض نار تشتعل . . صيحات رجال . . صهيل جياد وأصوات سياط . . عويل نساء . . ينتهى ذلك حيث يصدر الأربعة أهة طويلة)

المجموعة : (معا) كان يوم ثقيل وغريب . .

يوسف : والغريب أكثر (صمت قصير) ازاي عنيه جابتها يا ابو محفوظ وأنا ع المشنقة يومها . . من وسط ميات الوشوش مغطية السطوح (يرتفع عويل خافت مكتوم ذو ايقاع منغم) ازاي عنيه جابتها . . كل النساء بتنوح وهيه وحدها ساكتة . . مدهوشة يا زهران وأنا مدهوش . . سألت عنيه العنين السود المدهوشين . . الموت قريب بالشكل ده ورخيص !!

محفوظ : اللحظة كانت غريبة قوى يا ولاد . .

سيد : والموت بالشكل ده أغرب .

محفوظ : (يتذكر بدوره) ما كان فى الجو يومها غير

المويل وصويت النسا والرعب (يعلو أكثر العويل
المنغم) يومها اختنى وغاب الحمام . . والسما من
غير حمام فى دنشواى زى أرض زرعها محروق . .
كل الحمام اختفى . . الا هو . . ذكر الحمام أبو
نقطة سود . . كان صاحبى ووليفى . . وأنا
طالع على سلم المشنقة لتيته يرفرف على راسى . .
طلعت وأنا نظرى عليه . . طالع على المشنقة ونظرى
كله عليه . . رفر فطار . . وأنا نظرى عليه
. . بد بعد . . وأنا نظرى عليه . . صلبت حيلى
وأنا واقف ع المشنقة لاجل مايفيش عن نظرى . .
وتبته عن كل شىء . . الا جناحاته البعيدة وفجأة
شدو الطيلية من تحت رجليه (يهبط بالخلف بقوة
ظل المشنقة . . يدقون الارض معا بعصيهم بنفس
القوة ويطرقون) .

المجموعة : (معا) شهقة (صمت) .
سيد : (يرفع رأسه) لكن . . كنت جاسر يا بو محفوظ .
يوسف : خليتنا نمسك حيلنا بعدك . . الرعب م الموت
كان طير صوابى قبلها .
محفوظ : أبدا منيش جاسر . . كنت تايه بس ويا الطير
الى بيسلم يا سيد . . كان طير وفى . . أبدا منيش
جاسر . .

زهران : (غاضبا) ليه تعاند كل مرة فى دى ..

محفوظ : أنا كنت فعلا مش خايف م الموت .. وليه
أخاف .. سبعين سنة م الشسقا .. ايه انتظس
بعدها .. ما كانش عندى غير أمل واحد وراح
.. راح فى نفس اليوم .. قبل الحادثة ما تحصل .

(يختفى القمر ثانية خلف غمامة ويظلم المسرح)

محفوظ : (فى الظلمة) كان يوم ثقيل من أوله .

المجموعة : (فى الظلمة) كان يوم ثقيل ..

موسيقى

محفوظ : (فى الظلمة) يومها صحيت فى الفجرية
على خبط شديد ع الباب وكأنى فى حلم .

(طرقات شديدة بأعلى)

صحيت عشان أسمع نكتة .. جى يقولها لى كلب ..

صوت : (بأعلى) افتح يا بو محفوظ .

صر محفوظ : مسروع كده ليه ..

الصوت : أنا فهمى أفتح ..

صر محفوظ : مين فهمى ؟

الصوت : وكيل العمدة يا راجل ..

(يضاء بالمستوى الأعلى حول محفوظ ووكيل
العمدة)

فهمي : هيه فين ؟

محفوظ : ايه هيه ؟

فهمي : ماهيش في الدورة بتاعتك فتشناها .. انطق
فين هيه ؟

محفوظ : (ناغذ الصبر) ايه هيه يا فهمي ؟

فهمي : البقرة وبطل لؤم .

محفوظ : البقرة (صمت) ما انت عارف انها اتسرقت
منى يا غبي امبارح .

فهمي : وانت عارف هيه فين دلوقت برضه ..

محفوظ : عجائب يا خلق .. جى بتصحيني الفجرية
وتسألني عن بقرة اتسرقت مني .

فهمي : مكر مانيش عايز قلت .. انت سرقتها تاني .

محفوظ : (يحدق فيه ثم يمسك به في شدة) يبقى
مفيش غير حاجة واحدة .. انت اللي كنت واخدها
برجالتك ..

فهمي : (يدفع يده بعنف) شيل ايدك .. لاقطعها
اتجننت .. عجوز ناقص ومحتاج الأدب فعلا ..

- محفوظ : وخذتوها يا فهمى عشان أتأدب ..
- فهمى : وهرجعها ..
- محفوظ : انت الى هترجعها مش أنا ..
- فهمى : بتقول ايه يا حسن (سمت) اسمع يا راجل ..
- خلصنى وأسبهاالك من غير قلبه مخ ..
- محفوظ : ويعنى ايه أخلصك ..
- فهمى : يعنى ما تعملش راسك براس الباشا سلطان ..
- لو زودت هيمسح بيك الأرض ..
- محفوظ : بذك أسبب الشبر ونص عشانه اشتري حدا أرضى ..
- فهمى : راح يدبك غيرهم .. فى انهى داهية هتختارها ..
- ريحنى بقى أنا قرفت ..
- محفوظ : وتعرف ليه انت وتتضايق .. وكيل العمدة ولا وكيل الباشا .. ؟
- فهمى : حسن يا ابو محفوظ ..
- محفوظ : ربح نفسك يا فهمى .. بعد السن ده مش ممكن أكون حره .. خلقت رجاله ومش عارفه تعيش .. كثير قراطين أسبهم لعيالهم (بحسم)
- مش راح أفوت الأرض ..

فهمى : (يدفعه) طب بقى خلىنا فى موضوع البقرة
.. قدامى .. هاتها ومن غير ما تلاوع ..

محفوظ : (يدفعه بدوره) بجح وضلالى وكلب ..
فهمى : يانهارك أسود .

محفوظ : (يصيح) قوموا يا خلق وشوفوا .. زمن
أغبر معوج وخسيس ما يعدله والله غير الفاس
(يمد يده الى فأس بجواره) أخرج م الدار ..
أخرج قبل الفاس ما يطولك .

(اظلام .. يعلو الأرغول ودقات الدفوف ..
غناء .. يضاء المستوى السفلى ثانية بظهور
القمر من خلف غمامة ..)
(موسيقى)

محفوظ : كان يوم تقيل من أوله ..
المجموعة : (معا) كان يوم تقيل ..

محفوظ : قلت هياخدوها هياخدوها ومفيش فايدة ..
ايه تعمل يا بو محفوظ .. الموت ساعتها هان عليه
يا زهران .. ماعاد لى شىء أخاف عليه .. علشان
كده .. كنت قصاد الموت ثابت ..

يوسف : لكن عارف كانت فى البقرة يا بو محفوظ ؟
محفوظ : بعدها جه الطوفان .. أسأل على ايه ..

زهران : كانت عندي البقرة يابو محفوظ ..

محفوظ : عندك ؟؟ !؟

زهران : أيوه (صمت) قالوا بقرة حسن أبو محفوظ
اتسرقت .. على طول فسرت الملعوب .. كانوا
عابنتها في دروة فهمي لحد ما تنبيل .. رحت في
نفس الليلة وناوي ع الشر ياأما أرجعها لك (صمت)
ما قابلتش حد .. وسعيت البقرة لداري .. على
بال الصبح ما ييجي وأرجعها لك يابو محفوظ لكن
حصل الي حصل يومها مع النواجات (يضحك في
سخرية) وفي التحقيق قالوا .. ومسكنا معاه
بقرة مسروقة لما قبضنا عليه ..

يوسف : لكن تعرف يا زهران .. وانت صاحبها من
دروة فهمي ليلتها أنا شفقتك .. كنت ليلتها أنا
قاعد في الوساية لوحدي .. فت ساعته مولد
سيدي شبل وركنت أفكر ..

المجمعة : (معا في حنين) مولد سيدي شبل ..

يوسف : أيوه .. مولد سيدي شبل ..

(تتصاعد تدريجيا أصوات متداخلة للمولد
يعلو عليها بشكل ملحوظ ابتهاج حزين ..)

يوسف : ليلتها المولد كان زحمة .. زحمة شديدة ..
الواحد مش ماشى لكن مزقوق ماهو عارف وخداه

على فين الزحمة ولا عارف أخرتها .. ولا قادر
يختار حنة يروح فيها .. مزقوق مزقوق .. والمولد
داير شغال .. وأنا ماشي الزحمة بتدفعني .. زى
حياتى وعيشتى الغيرة .. مزقوق فى الزحمة
ولا حد داريبى ولا طائل شط .. ويهل الليل
اتلقح ويا الناي .. وفى وسط الزحمة .. وفى
وسط الزحمة يابو محفوظ .. لقيتها قصادى ..
اتسمرت قصادها ..

(تظهر نرجس بأعلى فى بقعة ضوء)

نرجس : يوسف .. ازيك .. عامل ايه ؟

يوسف : (من مكانه) تايه .. تايه يا نرجس فى المولد

نرجس : مسيرك تلقى البر ..

يوسف : ازاى .. امتى .. أنا متبعطر الفين حنة ..
نفسى ألملم قلبى المتنطور منى .. نفسى ألملم وشى
المتتطع بين الناس ..

نرجس : ربنا موجود ..

يوسف : ينجدنى يا نرجس أنا غرقان .. لو قششة
أمسك فيها .. لو حوض أزرة ع الترعة .. لو
عش وبقرة .. لو معجزة تنشلنى لاجل أوصل
ليك ..

نرجس : ربنا موجود ..

يوسف : نرجس نادى معايا .. نادى معايا سيدى شبل (تختفى) .

نرجس : سيدى شبل ..

يوسف : (يدور مناديا) ياسيدى شبل .. اتشفع لى ياسيدى شبل .. ياسيدى شبل (يجلس)

وصوتى راح وسط المولد .. والزحمة خدتها بعيد وياه .. ورجعت الوسعاية وش الفجر .. وشوية لقيت خالها .. مدنى .. راجع م المولد هو كمان .

(يضاء بأعلى حول مدنى)

مدنى : مين الى هناك ده ؟ (يحملق) هو انت ..

يوسف : أيوه أنا يا بابا مدنى .

مدنى : وبتعمل ايه عندك يا وله .

يوسف : قاعد أفكر فى الدنيا ..

مدنى : لأ يا شيخ .. الواد له مخ وبيفكر (يتهقه)
بتفكر فى البهايم ولا فى الأطيان .. ولا بقى فى
مشاكل الممدية ياخى .. امال لو ماكنتش بطولك
ومبرطع .. قرش من هنا .. وهدمه من هناك ..

يوسف : ايه بس يا بابا مدنى .. هو حرام أفكر .. المولد
لف دماغى .. قلت اقعد هنا مع نفسى شوية ..
كفرت ..

مدنى : كدهه .. بقى حضرتك جى م المولد ..
يوسف : ما انت جاي برضه من هناك .. (يضحك)
شفتك أنا ويا الغازية يا عم ..
مدنى : غازيه فى عين أبوك قليل الأدب (فى استغزاز
أكثر) وكنت بتهيب ايه هناك .. البلى يروح المولد
يكون معاه قرش ينفع بيه أصحاب المولد .. مش
يتلقح على قفا غيره ..

يوسف : أهيه .. وهو أنا كنت مديت ايدى ليك
ولا لغيرك .. أما عجائب يا بابا مدنى ..
مدنى : طب قوم من هنا روح اتلقح فى الخص بتاعك ..
يوسف : وليه بقى .. طب أنا مبسوط كده .. ومش
عايز أروح الخص بتاعى دلوقت ..
مدنى : انما أنا ما بنبسطش لما بشوفك .. قوم فز
قدامى يالله ..

يوسف : ليه بقى كفى الله الشر .. زعلتك فى حاجة ..
مدنى : (فجأة) اسمع يا وله انت .. وبقولها على
بلاطة أهه .. ان شفتك تانى بتكلم نرجس بنت

أختي هقطع عيشك م البلد كلتها .. فاهم ..

يوسف : نرجس .. لاهو آنى لا سمح الله .

مدنى : فكرك انها سايبه .

يوسف : عارف انها مش سايبه .. وعارف انى ماحلتيش

البسلا الأزرق .. وعایش بالزق .. وأحسن لى

أشوف لى غرقه .. بس أنا مش هسكت على كده ..

أنا هنزل ع البندر واشتغل ..

مدنى : تشتغل ايه بقى ؟ زمار بزمارتك دى ..

ولا قرداتى ..

يوسف : ما تتمالسش ياعم مدنى .. أنا مش هرجع

الا وأنا محوش .. أشتري قيراطين وجاموسة ..

وساعتها هروح لخالتي أم نرجس وأكلها ..

مدنى : وتكلمها ؟ .. تكلمها فى ايه بقى .. تكونش

بتفكر ..

يوسف : ليه لا يا بيا مدنى .. هو انى مش راجل ..

مدنى : لأ .. راجل ونص .. سيد الرجالة كمان ..

انما جى على نفسك ليه كده .. واحنا قد المقام ..

ما عندك بنت العمدة .. ولا بنت سلطان باشا

ويبقى يوم المنى عند الباشا .. ولا أخطف رجلك

مصر وأخطب بنت الخديوى (يصيح) الدنيا جرى

فيها ايه ياولاد .. العالم اتهدت .. حته عيل
صايح من غير اهل ولا متوى يخطب نرجس بنت
أختي .. يناسب عيلة أبو غانم .. ده انت شحات
ياوله .. ده انت بتقول لله يا محسنين يا وله ..
ليلة سودة .. طب ما عيلة أبو غانم تشوفلها تربة
تتويها بقي .. قسما بالله العظيم لو تفتح بقتك
بكلمة في الحكاية دي قدام حد .. لنكون دافنينك
في سابع أرض ..

يوسف : هيه جريمة .. هشتغل ويبقى لي أرض
وأعيشها ..

مدني : اتلهي على عينك واكتم ..

يوسف : أنا مغلطش فيك للوقت .. ثم ان كلامي
ما يمسش نرجس في حاجة .. أنا بطلب الحلال
.. الحلال ياعم مدني .. ما بطلبش حرام ولا بجرى
ورا الغوازي ..

مدني : (يرفع يده) اخرس يا كلب ..

موسيقى

(اظلام حول مدني مع صوت الصفعة)

يوسف : (بعد صمت قصير) حاجة تضحك .. ايه
خلاني أقول له غوازي وغازية (صمت) الكف
نزل على خلقتي ولع نار جوايه .. وفضلت ليلتها

يا زهران زى الدبيعة أنزف .. مديت ايدي على
النأى يمكن يفتنى ويخفف الوجع .. النأى خرس
مانطقتش أبدا فى ايدي .. وشوية ياسيد، ثات
زهران .. صاحب بقرة أبو محفوظ .. منظره
قدامى وأنا غرقان فى الغم نشلنى .. ما أعرفش
ازاى .. حسيت انى قصاص أبو زيد .. أو ان
قصاصى دياب .. حسيت ان أبويا قام فى التربة
عفر وجه ينبدنى .. كان ودى اندهله .. خدنى
معاك .. خدنى أناكف فى الظلمة وفى الدنيا
السودة ..

زهران : (بسخرية) كنت عايز تبقى حرامى يا يوسف
زى ..

سيد : مين قال انك كنت حرامى ..

زهران : الباشا ووراه العمدة .. والمحكمة قالت ..
سيد : لكن الناس عمرها ما قالتها .. راجل كنت
وحقانى ما تمدت ايدك أبدا على مكسور .. ياما
كانت ليك وقفات ويايا ومع غيرى ..

يوسف : ساعتها فهمت اكثر زهران .. حسيت لحظتها
انى قصاص راجل .. ممكن ياخذ بيدي .. مايقشش
الغلب ويسكت .. مايقشش ينوح .. عارف الدنيا
وبيكيلها جامد بالمكيال نفسه ..

محفوظ : لكن ايه الفائدة ؟ .. كان بيناكف زمن أعوج

.. عوجه صعب ثقيل .. كان ببيع بيخوفهم أه
.. لما الواحد منهم يعمل عملة .. كان من جواته
يقول .. زهران راح يعمل ايه ويايا .. فهمى
لما سرق البقرة كان بيسأل زهران راح يعمل ايه
.. يمكن كان عارف ان البقرة لما اتاخذت تانى
منه .. زهران هوه اللى واخدها يرجعهاالى .. مع
ذلك جه يسألنى أنى ومش هوه .. بيخوفهم أه ..
بيطش فيهم مايهموش ويخش بصدرة فى أى قضية
حق .. يسرق علشانها أو يقتل .. لكن ايه
الفايدة .. اللعبة أكبر .. فهمى بيعميه الباشا
.. والباشا له ضهر فى مصر .. والضهر بيعميه
الخواجات .. لفة كبيرة ومتشبكة جامد .. وفى
لحظة لقينا نفسنا جوه الشبكة .. وفى لحظة رحنا
بلاش .. قالوا يموتوا فمتنا .. (صمت) ايه
بقى معنى ان فى وسطنا راجل زيك يا زهران ..
ايد معنى انك بتخوفهم لحظة ..

زهران : (بجدية شديدة) بالضبط كلامك يا ابو محفوظ
.. وبفكر فيه .. كان ايه فايدة عندى قصاص
الدنيا .. (صمت يحدق بعيدا) .. كانت دايمًا
تسألنى ..

(تظهر أمه بأعلى)

أمه : يا محمد .. يا محمد ليه فايت راحة القلب ..

هداوة السر .. ليه ليل ونهار تجرى ورا قضاك ..
زهران : (من مكانه) فين هوه .. يجينى قضايا ..
أمه : يا ضنايا ارتاح .. ريحنى .. الأرض وعرضوها
عليك من تانى .. ارجع ليها زى عباد الله .. خذ
صابحة وافتح دارك .. عيش زى بقتيت الخلق ..
سيبك م السكة دى .. السكة دى نار .. نار
مالهاش ميه تطفئها ..
زهران : أرجع للأرض .. بعد ما دفنوه فيها !؟ كان
يجرى ورا راحة القلب .. هداوة السر .. ماشى
جنب الحيط .. لحمار العمدة يحط سلام ..
أبويا درويش الطيب .. وفى لحظة وايدة على
الفاص .. انطلق رصاصة بنكله .. كلب ومات ..
فاكره كويس .. كنت أنا واقف طولى شبر قصادهم
وفى ايدى جزرة باكلها .. شيلتها من بقى ..
وسألتك ليه .. ليه يامه ..
أمه : ده قدر مكتوب يا محمد .. هتغير فيه ..
زهران : أيوه هغير .. طول مانى عايش همه الى
هيمشوا جنب الحيط .. راح أقصقص جناحات
الأندال الدود ..
أمه : وتعود لى الفجر ليلاتى ومرارة الدنيا فى حلقك ..
زهران : أحسن من طعم الذل ..

أمه : ليه يا محمد .. يكفينى ضنى يا ضنايا .. ايه
الفايدة .. (تختفى) ..

زهران : ايه الفايدة .. حقانى ولا بس توب الحرامية
.. قاطع طريق وابن ليل بيدور للناس ع العدل
.. لكن فايدته ايه ..

محفوظ : فايدته ايه .. الباشا وفتناه باشا وأكثر ..
وفهمى كلب الباشا فضل فيها واحنا مشينا فطيس ..
سيد : هلباوى بيه الى وقف يطلب راسنا فاته دلوقت
وصل باشا ..

محفوظ : والنواجات فتناهم سايقين دول كلتهم ..
كلمتهم ع الكل .. أسياذ البر وأسياذ الدنيا ..

زهران : اذا كان كده يبقى الدنيا ماشيه ازاي .. ايه
يحكمها ؟ (صمت) أنا كده برجع لسؤالي .. ايه
بيجينا بعد ما متنا لاجل ما نتجمع تانى فى نفس
اليوم ..

محفوظ : مسألة مالهاش معنى يا زهران .. زى حكاية
الدنيا بحالها ..

زهران : لا .. أنا شايف اتنا جايين علشان نعرف رد
.. وللازم أعرف .. لازم أعرف رد على الألغاز
الى أنا ما وصلتش فيها لرد .. ولحد مات ..

يوسف : وازاي نوصل للرد يا زهران ..
زهران : مش عارف ..
محفوظ : المسألة أصلا مالهاش رد ..
زهران : لها رد ضرورى .. والا ماكناش نتجمع .
سيد : آيه يثبت بس ..
زهران : مش عارف لكن حاسس (صمت)
يوسف : طيب .. نبدأ تانى نفكر اللى حصل يومها
بالضبط .. يمكن نفهم حاجه .
محفوظ : نبدأ .. يمكن ..
(صمت يدقون بعصيتهم فى تتابع)
زهران : أيوه .. أول ما سمعنا بوصول الضباط
الخوارج .. كان حدا فهمى وكيل العمدة ..
(تبدأ الاضاءة فى الخفوت باختفاء القمر
تدرجيا)
يومها الصبح .. سحبت البقرة بتاعتك يا ابو محفوظ
.. وطلعت قاصد دارك وقصدت ساعتها أمر معايا
البقرة قصاد فهمى ويشوفها معايا .. مریت
بيها على الدوار .. ولقيته عامل قاعدة .. (يكون
المسرح قد أظلم) .

سيد : كنت ساعتها أنا بتخانق ويا وكيل العمدة ..
البرج بتاعنا صحينا لقيناه متخرب .. رحت له
ومعايا أبويا وابنى حسين *

(يضاء المستوى العلوى كله .. فهمى يتخذ
مجلسه وسط مجموعة من الناس خلفه خفير ..
بين المجموعة سيد وأبوه عيسى .. ضرير ..
يمسك بيده حفيده حسين .. مدنى يجلس
بجانب فهمى .. بعض الفلاحين على الأرض) *

سيد : (يلوح فى وجه فهمى) تكونش عميت زيه ..
شش شايف الحمل اللى أنا شايله على دماغى ..
مدنى : (وهو يضربه بقدمه) أنا أعمى .. (يظهر
زهرا عن قرب) *

عيسى : (الأب الضرير .. ملوحا دون تحديد) ماكفاك
افترى يا فهمى يا بن جاد الله .. أبوك ماكنش
مفترى ولا ندل ..

فهمى : مالکش دعوة بأبويا ومد من هنا يا راجل ..
عيسى : انت اللى مالکش دعوة بأبوك .. كان لقمة عيشه
هناك عند الباشا معايا .. لكن كان راجل عفيف
.. عمره ما كان زيك يجرى ورا اللقمة النجسة
خليك ورا سلطان باشا ..

مدنى : اعقل يا شيخ عيسى بقى ٠٠ ابيه ٠٠
عيسى : اسكت انت ٠٠ البرج خرب وخلاص وفهمى
استريح ٠٠ ملعون ولا يورد على جنة ٠
فهمى : اتجننت يا راجل ٠٠ أنا أخرب برجك ليه ؟
سيد : مش عارف ليه ٠٠ علشان الباشا ٠٠
فهمى : باشا ايه ياوله ٠٠ هو كل حاجة الباشا ٠٠
الباشا بيلعب وياكم ٠٠
فلاح : عيب ياسيد ماتلبخش بقى ٠٠
سيد : لأ ٠٠ أنى بقول الباشا (يمسسك بأبيه) أبويا
الى ضيع عمره هناك فى سرايته يخدم ٠٠ وعنيه
راح نورها هناك ٠٠ ازاي دلوقت يرفض ان عديلة
تروح وتخدم ٠ ويلطخ وشه الأعمى كمان بالطين ٠
فهمى : لم لسانك لهتقلب غم على نافوخك ٠٠
فلاح : الواد ده اتجنن ٠٠
سيد : مين خللى الباشا يسمع بعديلة غيرك ٠٠ م الأول
وانت وراها ٠٠ لما عديلة قفلت كل السكك السو
فى وشك رحت تشنع ٠٠ لما بقت عزبه ٠٠
عيسى : قفل ع الموضوع ده ياسيد ٠
سيد : لأ يا بابا خللى الناس تعرف ٠٠

عيني : وهتعملك ايه الناس دي ..
سيد : (مستمرا) والآخر .. الباشا طالبها تخدم ..
بعدها واتدورت ع البرج الى حيلتنا .. ايه فاضل ..
فلاح : صلحه بقه وخلص ياسيد .. ولموها ..
مدني : حبكت يعني .. ماهو أبوه بيقرا في البيوت
وماشيه ..
سيد : استحي على دمك يا ضاللي .. اختشوا حبه ..
خللوا حداكوا شوية رحمة ..
مدني : ماتلم بقي .. انت هتقلبها مناحه ..
فلاح : خلاص بقي ياسيد ..
فلاح : سي فهمي في مقام العمدة وماتفكرش كده ..
فلاح : صالحه واحنا معاك ياسيد وبسيطة ..
فهمي : ما حدش يكلم الواد ده في حاجة .. وتلاتة بالله
العظيم اذا ماخذ أبوه وغار من هنا لأكون مطينها
على دماغه ودماغ أبوه ..
زهران : (يتقدم) حيلك شويه يا فهمي .. اذا ماكنش
عامل حساب عجز الراجل يبقى عشان سنه ..
فهمي : (يفاجأ به) وانت بتتدخل ليه ؟

سيد : لأ يتدخل .. مين م الناس دى يرضيه اللي
بيحصل .. البرج الى حيلتنا يخرب ليه .

زهران : صبرك شويه ياسيد ..

مدنى : لأ ده واد قليل الأدب بصحيح ..
(يدخل يوسف بيده الناي)

يوسف : مالك ياسيد .. وشك مزروود كده ليه ياوله .

سيد : أنا عارف آخرتها معاه ايه ..

يوسف : مين ده يا وله ..

سيد : وكيل العمدة .. وكيل العمدة ..

عيسى : ودراع الباشا .. دراع الباشا الممدود فى كل

مكان .. تهيش وتخرىش وتنكد عيش الناس ..

والناس طيبة خالص ساكتة .. طيبة خالص يا بلد

وأديك قلت وزعقت ياسيد .. عملوك ايه ..

أحسن لى أن أعمى لاجل ماشفكوش .. أحسن لى أن

أعمى (يرتعد انفعالا) .

زهران : خد أبوك انت ومد الوقت ياسيد .

سيد : (لابنه الصغير) خد جدك وصله للدار .. روح

يا بابا دلوقتى ولنا قاعدة .

عيسى : روح يا بابا .. نفسى أروح فى طريق مادد

ومالوش آخر .. ما أرجعش . مارجعش أبدا .

سيد : طب روح دلوقت ..
 عيسى : (ملوحا فى غضب) لأ مش ماشى (يتلمس مكانا
 ليجلس ويجلسه الطفل) سيبونى ..
 زهران : (لسيد) خده دلوقت بعيد عن خلقة فهمى ..
 سيد : الحكاية يا زهران .. زادت ..
 زهران : عارفها كويس زى ما حافظ فهمى كويس ..
 فهمى : طب مد معاهم انت كمان واقصر الشر ..
 زهران : مين قالك انى ناوى على شر .. أنا عايزك
 تسمع لى شوية ..
 مدنى : ماتكبرش الموضوع بالطريقة دى يا زهران ..
 فهمى : (يصيح بمبالغة) ايه ده .. جى يلم على الناس
 ويهددنى .. ولا الحكاية دى ايه .. ؟
 زهران : أنا عمرى ما بهدد حد .. اللى بشوفه بعمله
 على طول ..
 فهمى : شايف يامدنى .. شاهدين ع الكلام ده ..
 مدنى : ايه بس يا محمد يا زهران .. دى حكاية ..
 يوسف : وهوه قال كلام غلط .. ؟
 مدنى : انكتم انت يا وله وما تتحشرش .. انت
 هاتكلم كمان !

فلاح : ماهو برضه يا مدنى ..

مدنى : وانت هاتتكلم كمان ..

(أصوات تهدئة من الفلاحين .. يعلو عليها
صوت زناتى من الخارج)

ص زناتى : عمده يا عمده .. عمده يا عمده .. فين
يا ولاد العمدة .

(يدخل زناتى مهرولا .. ضخم رأسه حليق
تماما وجلبابه قصير جدا . يربطه من الوسط
بجبل ويمسك عصا .. يدير نظرة بسرعة فى
الجميع وهو يدور . ثم تتوقف بالوسط)

زناتى : كله يطاطى يدل دل بوزه وهس .. وصل
الزناتى خليفة بالسيف الحديد (يصل بعصاه
وسطهم) .

الخفير : ايه يا وله ..

زناتى : (مكمل) يبرق يا مدنى كما عيون الغازية
صاحبتك .. يقطع رقاب الديابة الدون .. مين
يطلع له .. مين م الأندال يطلع لزناتى خليفة ..
لاجل ما يقصف عمره وعمر أبوه .. شيخ منصر
كان ولا خواجه .. انطق منك له .. فين العمدة
يجينى دلوقت ..

مدنى : الواد ده اتجنن •

فهمى : امشى يا واد من هنا دلوقت انت كمان ••

زناتى : (لفهمى) لما زناتى خليفة يتكلم تسكت خالص
(للمجموعة) فى العمدة بقول يا ولاد ؟

الخفير : اتأدب يا وله •

يوسف : فيه ايه يا زناتى •• ؟

زناتى : أنا بسأل فى العمدة يجينى ••

فهمى : جك عفريت يا خدك •• فيه ايه ؟

زناتى : (ملوفا بعصاه فى وجه فهمى) انت بتتكلم
ليه •• انت العمدة •• انت العمدة عشان تتكلم
•• أما عجائب ••

مدنى : هو يا واد مطرح العمدة انطق وبلاش قلة حيا •

زناتى : أنا مش عايز عمدة العمدة ولا مداس العمدة ••

أنا عايز العمدة شخصيا وبلاش غباوة يا مدنى •

مدنى : (لفهمى) سيبك منه ياسى فهمى •• هنا خد على
كلام واحد أهبل •• امشى يا واد من هنا ••

زناتى : ذنبكو على جنبكو وبلاش •• هتتنيل على
راسكم ••

خفير : يا واد اتكلم حضرة العمدة نزل شبين ••

زناتى : وکمان نزل شبين .. يبقی واقعه سوده ..
مدنى : نهارك انت الى اسود ومش فايت .. انتو
هتفضلوا سايبين الواد ده يستهبل علينا كده ..
فهمنى : (للخفير) هات الواد ده هنا .

زناتى : (والخفير يحاول الامسك به) ايه يا واد
يا غفير انت .. سبنى يا وله لاطير راسك بالسيف
ده وكتاب الله ..

(يمسك به ويدفعه تجاه فهمنى)

فهمنى : (يمسك به) انطق يا وله .. انطق لأرميك فى
الحبس وأبطلك استعباط خالص .. انطق ..

زناتى : أما انك أهبل يا فهمنى يا وكيل العمدة
(يضحك) وكيل العمدة هيحط زناتى خليفة فى
الحبس .. طب اطلع حرمة لو قلت لأ .. خدنى
يا واد على هناك .. وابقى شوف مين هيقولك ع
الى حصل يا أهطل ..

زهراڻ : (وهو يجذبه تجاهه) فيه ايه يا زناتى حصل ..
زناتى : زهراڻ .. هوه انت هنا .. مش تقولوا م
الصبح يا بقر .. أهو كده بقی أنا لقيت راجل
أكلمه ..

زهراڻ : طب قول فيه ايه ؟

زناتی : هقولك انت بس (صمت يحملق فى الجميع
ثم كأنه يهمس لزهران) الخواجات وسلم ..

أصوات : الخواجات ..

فهمى : خواجات ايه يا وله ..

زناتی : (يقفز فى وجهه) اتأدب يا وكيل العمدة
وانده لزناتی باسمه .. فيه حد يقول لزناتی
خليفة يا وله ..

زهران : (يجذبه) خليك معايا هنا .. الخواجات دول
شكلهم ايه .. ؟

زناتی : شكلهم .. دى حاجة زيطة .. برانيط وبنادق
وحاجات بتلمع .. وشنبات مدهونة بالسمنة وهب
شمال ..

يوسف : عسكر يعنى .. ؟

زناتی : عسكر بشرابط ونجايم وبنادق ومصيبة وهب
شمال (يتحرك) سرعتلى برورر يا خواجه وادى
هب شمال .. حاز طوز يا خواجه وهب شمال ..
وسلام طوز يا خواجة وهب شمال .. والاقيلك
الدنيا اتقلبت .

فهمى : وصلوا ازاي وفين يا وله ..

زناتی : قاعد متنك هنا على راحتك تقرف فى الخلق

وبتسألني اني .. وعامللي وكيل عمدة .. شوفوا
الغيبة يا اولاد ..

زهران : وضع وصلوا ازاي وفي ايه يا زناتي ..

زناتي : أقولك انت بس (يتوسط المكان جالسا) أنا
بقي ماشي كده وبفكر وأغنى وألغن في أبو خاش
اللي في بالي .. وحاطط سيفي على قفايه ..
والأقيلك ياسيدي العربية أم حصانين بيض
والعرجي عم حباطه ..

مدني : بتاعة سلطان باشا يا وله .. ؟

زناتي : ايوه ياخويه .. بتاعة سلطان باشا حبيب
قلبك (يتابع) الأقيها يا زهران هله على الزراعة
بتتمخطر .. تريك ترك تريك .. قلت ياواد
يا زناتي خليفة سلطان باشا جى يخرب بيت مين
الدور ده ..

يوسف : أترايهم بقي همه .

زناتي : والأقيلك نازل م العربية كذا ديك رومي .

مدني : ديك رومي ده ايه يا وله ..

زناتي : قصدي الخواجات الانجليزي يا نبيه .. داهيه
تاخذ الحساوي (يتابع) وعنهما نزلو ومعام
أومباشي دبلان كده محتاس بيهم .. نزلوا بقي

كده (يمثل) بصو هنا .. كمل تاكيو .. وبصوا
هنا .. كمل تاكيو .. وكل واحد زامط البندقية
بتاعته على قفاه وايديه فى جيوبه كده ومنفوخ زى
الرومى .. ومراخيره حمرة بتلمع زى الجزرة فى
عز الشمس .. وعنهما قام الخواجة الأسطى الكبير
بتاعهم أبو شنب (ليوسف) بالك يا وله .. عنيه
زى عنين السمكة تمام (يتابع) جه بقى وسأل
الأومباشى الدبلان (يمثل) فيه هنا همامه ..
ولا مفيش هنا همامه .. الواد الدبلان قاله ..
يا سعادة لفندى .. فيه هنا همامات .. قتلته
أبوك السقامات وف ديله سبع لفات .. حنش
ياخذ أجلك ..

فلاح : نهار اسود .. الحمام ..

زهران : جاين يصطادوا يعنى .. والا الحكاية دى ايه؟

فلاح : الحكاية دى ايه ؟ ..

زناتى : (يكمل) رحت أنا شادد لجام الحصان وراقع
سيف الزناتى خليفة ومتقدم وقتله .. همامه ايه
نهارك مهيب .. امشى انجر على أمك منك له ..
فهى : بس خلاص اتلهى .. هيه دى الحكاية .. وهمه
فين دلوقت ..

زهران : يعنى ايه هيه دى الحكاية يا فهمى .. وقاعد
مستنى ايه ..

فهمى : والله عال .. وانت عايز ايه بالضبط ..

زهران : بيقولك جايين يصطادوا حمام البلد ..

سيد : ويعبوه فى زكايب ..

عيسى : زكايب من عند الباشا ..

فلاح : مش كفاية الى حصل السنة الى فاتت ..

يوسف : هيه الناس ناقصة ..

مدنى : طب وانت مالك انت .. عندك حمام انت
كمان ..

يوسف : عندى ولا ما عنديش .. مش بلدى زى ماهى
بلدك ..

فلاح : سنة غبره والله ياناس ..

يوسف : فاكرينها وسية أبوهم ..

زناتى : (الذى يتنقل بينهم مبتهجا) ايوه انطقوا ياغنم ..

فهمى : كن ياواد انت وهو لما أفهم ..

زهران : لسه هاتفهم ايه تانى .. خف وقوم يا فهمى
ليكونوا ح يصطادوا جوه البلد ..

فهى : يعنى ايه .. عايزنى أمنعهم ..

عيسى : شغلتك .. تمنعهم ..

زناتى : أهيه .. يمنعهم؟؟ بقى الحكومة تمنع الحاجات
.. دى الحكومة بتشتغل عند الحاجات زى ما قلت
قبل كده يا شيخ عيسى .. تقولها اقعدى يا حكومة
.. تقعد .. العبى يا حكومة تلعب .. عجبن
الفلاحة يا حكومة .. تعجن ..

مدنى : اختشى يا وله (للمجموعة) عيب ياناس ..
دول برضه ضيوف ..

زناتى : عداك العيب يا ماصل .. متربى وشهم ..
قوم بقى وادبح عجل ..

مدنى : يا واد اتلم يا وله (للمجموعة) اذا كان الباشا
سلطان وصلهم بالعربية بتاعته .. نيجى احنا ..

زناتى : ايوه يا مدنى .. الباشا ياخويه (يمثل) كل
سنة وانت طيب يا سعادة الباشا .. البت آل
يا سعادة الباشا راسها وألف بلغه الا ماتيجى
وتخدم تحت مداس سعادتك يا باشا .. وتبرم
شباتك يا باشا ..

عيسى : (يقف منتصبا) برضه الباشا .. الباشا الباشا
.. ورا كل مصيبة .. اذا كان هوو الى دخلهم
مصر .. ما يدخلهمش دنشواى ليه ..

يوسف : لهو مش عارف الى حصل عامنول وأول
عامنول .

سيد : والشكوى .. الشكوى الى كتبناها السنة الى
فاتت ..

فهمى : أيوه ياخويه الشكوى .. عشان جوز الحمام
بتاعك وبتاع أبوك الى قاعدين تنوحوا عليهم م
الصبح .. العمدة خد الشكوى ياخويه .. ووصلها
بنفسه المديرية .. عايزين ايه تانى ونعمل ايه
تانى ..

عيسى : شكوة ايه يا فهمى .. بتضحك على مين
يا فهمى ؟

يوسف : قصر الكلام .. انت الوقت مكان العمدة
وتمنعهم وبس ..

فهمى : معادش الا انت كمان تتكلم .. حاجة حلوة
قوى .. طب ماتوريني كده وتروح تمنعهم انت ..

زناتى : طب ماهو منعهم ..

مجموعة : مين ؟؟

زناتى : (بعد صمت) لهو ماقلتلكوش ..

زناتى : ايه يا زناتى ؟

زناتی : عم حسن أبو محفوظ ..
مجموعة : ماله ..
زناتی : منعهم ..
فهمی : منعهم یعنی ایه یا وله ..
زناتی : یعنی منعهم ..
فهمی : نهاره اسود .. الراجل ده مخه اتجنن خلاص
.. مش كفایه شال الفاس علیه النهارده ..
فاكرهم برضه الى خدوا بقرته ..
زهران : سيبك م الحكاية دى الوقت يا فهمی .. انت
عارف كويس مين الى سرقها (الزناتی) قل له
يا زناتی .. اتكلم على طول يا زناتی عمل ايه
وياهم بالضبط حسن أبو محفوظ ..
زناتی : شوف يا سيدى .. عمك أبو محفوظ كان
ماشى كده مكلم ويكلم نفسه بص لقاهم قدامه ..
قام راح واقف كده وساند ظهره على الهوا لورا ..
وحاطط ايده على عصايته لقدام ..
زهران : اتكلم على طول يا زناتی وما تطولش ..
زناتی : (فى سرعة مع استمرار التشخيص) قام
الأسطى الكبير بتاعهم الخواجة أبو شنب شافه كده
زينه خاف منه .. راح ملعب عنيه الى زى عنين

السمة وقال للواد الديلان بتاعهم •• ولد عبدالعال
هيه دى العمة •• ولا مش هيه دى العمة ولد ••
اجرى ولد هات العمة ••

مدنى : (يضحك) افتكروه العمة •• دى خيبه ••
زناتى : (لمدنى) بتضحك على ايه ياتلم (يتابع) الواد
الدylan قاله •• مش باين يا سعادة لفندى انه
العمة •• وألاقيك عمك أبو محفوظ يزعم
بعزمه ••

مجموعة : هه ••

مدنى : نهاره أغبر قال أيه ••

زناتى : (يصيح) سلاموا عليكم (ثم بهمس) قالهم
سلامو عليكم •• ان الديوك دى ترد ماحطوش
منطق •• قام الواد الديلان قرب عليه وقاله سلام
ياعم •• قام عمك أبو محفوظ قاله على طول ••
أنت بنى آدم لطح ••

مدنى : يانهار •• والخواجه الكبير سمعه •

زناتى : الواد قاله ليه بس ياعم الحاج •• عمك
أبو محفوظ قاله انطسييت فى نظرك •• جايب
الضباط دول حدا البيوت والأجران يصطادوا
يا وله •• حاكم همه عند جرون محمد عبدالنبى •

الواد الديلان قاله ماهمه عايزين كده ياعم الحاج
والسنة اللي فاتت جم برضه هنا .. قام عمك
أبو محفوظ راح شاخط فيه وقاله .. يصطادوا
بعيد عن هنا ..

فهمي : نهار أبوه مش فايت .. هيودينا في داهيه ..
يوسف : ودايه ليه .. مش خايف على ناسه .
مدني : أنا مش فاهم ياواد انت بتتكلم ليه . شألك ايه
.. لك ناس انت كمان ولا خايف على ايه ؟

زهرا : (مقاطعا) كمل يا زناي من غير تطويل ..
زناي : الواد قاله .. ياعم الحاج دول ما حدش يقدر
يقولهم حاجة .. دول أسياد البر والساحل ، عمك
أبو محفوظ زرايينه طلعت وقاله .. أسيادك
واسياد الباشا اللي بعثهم .. وعنهما الا والنواجة
الأسطى الكبير بتاعهم أبو شنب ييجي يرطن مع
الواد الديلان والواد الاكاده قعد يرطن معاه ..
هو يقول بربر بربر .. والثاني يقوله بربر بربر ..

فهمي : ده ..

زناي : (لفهمي) ماتكن كده (يتابع) عمك أبو محفوظ
لقيتهولك .. زهق مرة واحدة وزاط في الوله ..
ماتقول بيقول ايه الرجال ده يا وله .. الواد

اتلبيخ وقاله .. بيقول همه مبسوطين .. كده ..
بس (يجلس فجأة صامت) .

فهى : وبعدين ياوله (زناتى صامت)

يوسف : ما تنطق يا زناتى عملوا ايه مع أبو محفوظ .

فهى : عمل ايه وياهم الراجل ده يا واد انطق ..

زناتى : بقى انت وكيل عمده انت .. فيش كباية شاي

ولا حتى سيجارة .. قاعد اتكلم م الصبح وأقول

.. أحكى وأتكلم وأقول .. وأعملكو أسطى خواجه

وسمكه وهب شمال ونيله ..

سيد : يا زناتى اتكلم .

زناتى : لأ .. كفايه عليكو كده .. مفيكوش خير .

فلاح : قول بقى يا زناتى ..

مدنى : هيكون ايه تانى يعنى .. هيسبهم طبعاً

ويمشى ..

أصوات : لأ قول يا زناتى .. قول يا زناتى .. قول

يا زناتى ..

(يدخل الشيخ معروف)

معروف : ايه الزيتة دى ..

فهى : عالم هتودينا فى داهية ياشيخ معروف ..

معروف : داهيه ايه لا قدر الله ياسى فهمى ..
فهمى : (للخفير) روح شوف لى الراجىل حسن
أبو محفوظ ده عند جرن عبد النبى حالا ..
زهران : علشان ايه يا فهمى .. علشان قال لهم روحوا
اصطادوا بعيد ..
فهمى : علشان هيخربها على دماغكم .. دول الانجليز ..
معروف : همه هنا ..
فهمى : زى ما كل سنة بيصطادوا .. والباشا وصلهم
بنفسه .. فيها ايه .. عملوها غاغة ومحمد زهران
قاعد يقومهم .. وأنا بشهدك عليه أه ..
مدنى : غاغة ايه .. ناس ناقصه عقل صحيح ..
عايزين ايه بالضبط ؟ عايزين تقولوا للغولة عينك
حمره ..
زناتى : ايوه يا مدنى يا عاقل .. طب أنا أهبل بقى
وهقول للغولة عينك حمره واشوف هتعمل ايه
(يصيح) يا غولة عينك حمره .. عينك حمره
يا غولة يا غولة عينك حمره (يردد فى هوس) ..
مدنى : بس يا واد اتهد .. باينكوا اتعديتوا م الواد
الاهيل ده .. اتهدوا بالله واعقلوا .. وماترموش
بنفسكو فى التهلكة ..

عيسى : اتق الله فى كلام الله يا مدنى .
مدنى : اسمعوا الى بقولكوا عليه .. سيبوهم يهيبوا
الى يهيبوه ..
عيسى : خلاص اسمعوا كلام مدنى .. واستنوا لما
يحرقوا الأجران ويحرقوما باللى فيها .
مدنى : ماتشعللهاش يا عيسى .
فهى : ما انتوش قد الكلام ده .
عيسى : كفاياك تهديد فى الناس يا فهمى .
مدنى : تهديد ايه يا عيسى يا أبو سالم .. دول انجليز .
زناتى : (هائج) الغولة .. الغولة يا اولاد .. الغولة
.. عينها حمرة يا ولد .. مين يقول للغولة عينك
حمرة ..
عيسى : الى فى قلبه ايمان وفى نفسه كرامة ..
فهى : عيسى يا ابو سالم ..
مدنى : عايزهم يعملوا ايه يا عيسى يا ابو سالم ..
عيسى : يقولوا للخواجات لأ ..
مدنى : يعنى ايه ..
عيسى : يعنى اذا ماكنش الى عامل وكييل عمدة ده

يبعدهم عن الأجران والبيوت .. الناس تبعدهم ..

مدنى : ده كلام فيه هلاك الناس •

عيسى : هلاكهم فى سكاتهم ..

معروف : سكات ايه وكلام ايه يا راجل .. دول غلابه

.. همه عارفين يعيشوا لما هيناطحوا الانجليز ..

خليهم فى حالهم وغلبهم .. لأن كلامك ده مايرضيش
ربنا ..

عيسى : اللى بتقوله انت هو اللى مايرضيش ربنا •

بسم الله الرحمن الرحيم « ان الذين توفاهم الملائكة

ظالمى أنفسهم قالوا فيما كنتم ، قالوا كنا

مستضعفين فى الأرض ، قالوا ألم تكن أرض الله

واسعة فتهاجروا فيها ، فأولئك مأواهم جهنم وبئس

المصير » •

يوسف : لك حق يا ابو سالم ..

سيد : الناس دى تتلم عننا بقى •

سيد : كفاية اللى احنا فيه م الباشا وكلايه •

سيد : يروحوا يصطادوا فى أرض الباشا اللى بيعتهم •

فهى : (ينقض) انكتم ضربه فى قلبك .. انتروا

زودتوها خالص .. هيه حصلت الباشا .. ثلاثة

بالله العظيم اللى هيزود بعد كده كلمة واحدة

لأكون مبلغ عنه .. وموديه فى داهيه .. الناس
دول جايين رسمى .. وهيصطادوا ويمشوا ..
ومش عايز حد ينطق بكلمة واحدة ..

زهران : (مندفعاً ناحية فهمى .. ممسكاً به رافعاً
أياه من على الأرض جاذباً له الى الوسط) اسمع
يا فهمى انت فى نظرى .. دودة مش أكثر ..
دودة كان ممكن أفقصها من بدرى .. وأريح منها
الخلق التعبانة .. لكن أنا سبتك .. أما الوقت
خلاص ..

فهمى : (مستغيثاً) شايفين شاهدين ..

مدنى : ابعد عنه يا زهران ..

زناتى : سيبه .. سيبه يعمل عيشه .. اصرخ زى
الحرمة يا سبع الليل يا دياب ..

فهمى : شاهدين .. بده يموتنى ..

زهران : (يشدد قبضته) اسمعنى كويس .. من دلوقت
وطالع هعلمك الأدب .. شايف البقرة الى رابطها
هناك دى .. دى بتاعة حسن أبو محفوظ الى انت
سارقها .. هرجعهاله الوقت .. ولو حد قرب له
أو مد ايده على أرضه هيكون برقتك .. برج
الراجل ده هيتصلح والليلة .. واعمل حسابك
يا فهمى .. انى من دلوقت وراك خطوة بخطوة ..

(يدفعه أمامه) والوقت قدامى .. تروح دلوقت
تفهم النواجات الأندال دول .. يصطادوا بعيد عن
الأجران والناس .. يا اما هروح أنا والناس دى
ونمنعهم ..

زناتى : (يصرخ فجأة) يا ولاد .. الغولة ..
(يلتفت الجميع نحوه)

زناتى : الغولة عملتها ..

(يشير الى الخلف حيث تضىء الخلفية باللهب)
جرن محمد عبد النبى يا ولاد .. النار ولعت فيه
.. الغولة ولعت الجرن .. الغولة ولعت الجرن ..
(اظلام .. تبقى الخلفية مضيئة باللهب ..
مع سلويت لمجاميع تعبر عن المشهد .. ترتفع
الدفوف بسرعة وقوة ..

تظهر الشخصيات الأربعة أيضا بمكانها عند
المقابر على ضوء الخلفية المشتعلة .. فى تعبير
مقابل يتصاعد ..

(يدخل خلال ذلك الراوى وبسرعة ليقف بين
المستويين)

الراوى : عملتها الغولة .. النار

الأربعة : النار *

الراوي : شبت في جرن محمد عبد النبي من تلق
الكابتن بول ..

الأربعة : وساعتها جرينا .. جرينا .. يوسف ..
زهران ..

الراوي : الكل بيجرى يطفى النار .. يوسف .. زهران
الأربعة : قلنا الى عملنا حسابيه حصل ..

الراوي : لكن مرات عبد النبي صاحب الجرن .. كانت
عامله حساب مدهولة في ايدها المسدرة والذرة
بتسأل بتقول ليه ..

الأربعة : ونادوا .. ابعدي يا أم محمد ..

الراوي : لكن الطلق سبق ..

(صوت لطلق نارى مضخم)

الأربعة : أم محمد .. حاسبي ..

(تسقط في السلويت امرأة)

الراوي : والكل بيضرب لسه ..

الأربعة : قلنا يا يوسف .. شيل منه سلاحه ..

الراوي : لكن الطلق الثاني كان أسرع ..

(صوت طلق مضخم)

الأربعة : شيخ الخفر انطخ •

(يسقط رجل بالسلويت

يزداد الضجيج بالخلف ولكن تعلو عليه صوت
الأربعة)

الأربعة : (بالتناوب) وساعتها النار انتقلت م الجرن
لجوه الكبد لنن المين • • الدم فى صدر حمامة • •
وفوق القش • • والشمس لهيب مسمور • • وطنين
وطنين وطنين • • (حركة سارية ويختلط المستويين •
يندفع زناتى غير واضح الملامح ليدور صائحا فى
دائرة تشمل المستويين) •

زناتى : الغولة • النولة • • ارعوا الغولة تاكلكم • •
الغولة دى فاجرة وقادرة وزناتى هيعمل ايه • •
قلبي عليكم يا عيال • • سيف الزناتى انكسر • •
سيف الزناتى انكسر • • سيف الزناتى خشب • •
سيف الزناتى خشب •

(اظلام)

● • القسم الثاني

- المسرح مقامهم •

- يدخل من يمين المستوى الأعلى الراوى وييده المصباح
•• تعلق دقات الدفوف مع الارغول ••

الراوى : زمان •• أيام أجدادنا القدام •• من قبل
موسى وعيسى ومحمد •• كان الميت لما يموت
بيحطوا معاه جوده التربه •• زاده ولبسه واللى يحبه
من دنياه •• وكأنه طالع مشوار وكأنه راجع تانى
ومامتش •• الموت مش آخرتها •• وضروى
يكون مش آخرتها علشان الدنيا ماتبقاش كدبة ••
« يهبط قليلا فيبدأ فى الوضوح الأربعة
بأسفل »

• هنا يا صاحبي نفس الشيء •

« يشير الى أسفل حيث الأربعة »

موتهم وحياتهم كانت ايه ؟ • وعذابهم كان
ليه ؟ • ولشين السكه ؟ • لسه السؤال متعلق
فوق روسهم بيدوروا على رد • •

« يتضح وجود الاربعة اكثر ظهورهم
للمشاهدين »

« دقة • • عاليه فيستديرون قليلا »

الراوى : سلطان باشا وصلهم بالعريية لحد مكان
الصيد جوه الدور •

« دقة فيستديرون أكثر »

ووكيل العمده ماعندوش علم لكن مش ممكن
يمنعهم • •

« دقة فيستديرون تماما »

وحسن محفوظ كان الوحيد الى قابلهم
ويا زناتى • • كان طلبه بسيط لكن حاسم • •
زى اليأس الى فى نفسه بعد ماراح القيراطين
• • يبعدوا عن الأجران والناس • • لكن مين
هو حسن محفوظ مين هوه ومين غيره • • ؟
« يبدأ الأربعة فى التحرك كأنما يبحثون عن
شئ مافى الأرض يدقون بعصيتهم دقات موازية
لدقات الدفوف • • »

المملكة جايه بتتسلى بعد ما موتت الأوباشى من

حقها تتسلى وتجرب وتشوف .. مين هيقولها
لأ .. ولدهشتها لقيت لأ .. انما يا خسارة
أحنا اللى بنظلمهم دايمًا بندافع عنهم ونقول
ده حرام .. ما قالوش لأ ومظاليم (صمت)
أبدا .. مظاليم لكن قالوا لأ .. وده شئ مش
لازم ننساه أو نغالطهم فيه .. على كل مش دى
المسألة دلوقت المسألة الأخطر زى ما قلت ..
هيه سؤالهم .. ايه اللى حصل بالضبط
ومعنااته ؟ يا ترى معنااته هوه اللى بيجمعهم
بعد ماماتوا .. ؟

بيدوروا لسه .. نفس الفراعنة القدام
وفلاحين دنشواى الحادثة .. وولاد مصر
الوقت يفتكروا اللى حصل دايمًا ويفتشوا ع
السر ..

« سلويت بالخلف مع غناء »

بعد المعركة جرى ضابط منهم مجروح ..
لحقته ضربة شمس ومات والمحكمة وانتصبت
المجموعة : (وهى تتوقف عن الحركة) المحكمة
وانتصبت ..

الراوى : المحكمة كانت خمسة •

محفوظ : ثلاثة منهم كانوا خواجات •

الراوي : والمدعى كان هلباوى .. هلباوى بيه ..
محامي كان قبل الحادثة ما تحصل وطني .. يلمن
كل مسا وصباح بريطانيا والاستعمار ..

يوسف : وطلب رقابينا بدون رحمة هلباوى بيه ..
الراوي : وفي بولاق .. كانت المشانق بتتعضر .. من
قبل المحكمة والحكم ..

زهرا : والحكم .. صدر ..

الراوي : اعدام ..

الأربعة : اعدام ..

(تعلقو دقات الدثوف ويسطع مكان السلويت
قرص الشمس كالبحيم) ..

الراوي : ٢٨ يونيو .. وفي نفس مكان الحادثة ..
محفوظ : كان الجو هجير ..

الراوي : (بايقاع أسرع) نسيبوا المشنقة وسط
الساحة ..

زهرا : وعليها الراية الحمراء بلون الدم ..

الراوي : لموا جميع الخلق وبالأمر .. مافى عيل أو
شيخ يتخلف الكل لازم يشرب م الكاس ..

الأربعة : الكل هناك .. الكل ..

محفوظ : لولاد وعيالهم .

يوسف : نرجس . .

زهران : وأم محمد زهران .

سيد : والراجل الأعمى . . جروه للساحة . . لاجل

يشوف . . عيسى أبويا كان جره حسين ابني . .

الراوى : نصبوا فى وسط الساحة ثلاث خيام . .

سيد : خيمة تتغسل فيها بعد الشنق . .

يوسف : والثانية لى ح يتجلدوا . . يترموا فيها بعد

الجلد .

الراوى : والثالثة . . (يقطع غناء قصير وهو ينسحب)

محفوظ : الثالثة اتلمينا فيها قبل الاعدام نسمع جواها

صوت الى بيتجلدوا مغطى عليه صوت النسوان

وعياط الخلق . .

سيد : وساعتها . ناديتك يا ابو محفوظ . قرينى آية

الكرسى . . لاجل ما قلبى يكن فى صدرى . .

موسيقى

محفوظ : ونادونى . .

صوت : قرار محكمة مخصوصة .. المتهم حسن على
محفوظ .. تنفيذ الحكم .. اعدام ..

(صوت ارتطام)

سيد : ونادوني .. كان اسمى غريب على ودنى ..
وكانه واحد تانى ..

صوت : قرار محكمة مخصوصة .. المتهم سيد عيسى
سالم تنفيذ الحكم اعدام ..

(صوت ارتطام)

يوسف : ونادوني .. وأنا ميت قبل الموت ..

صوت : قرار محكمة مخصوصة .. المتهم يوسف حسن
سليم .. تنفيذ الحكم .. اعدام ..

(صوت ارتطام)

زهران : (يقفز مع الصوت) مش بطلع للمشنقة تانى
.. مش ح أمشى فى جنازتى ألفين مرة ..

ونعيد ونلف ونرجع للحظة السوداء وكاننا ماينتجمع
الا عشان نغرق فيها .. الدوامة تشدنا ليها ..

سيد : ليه ايوه ؟

يوسف : ليه الحق مالersh دليل .. ؟

زهران : ليه .. مع ان حياتى كلها كلمنة حق ..

والآخر مدهوسة بكل نعال الدنيا .. وكانها كلمة
من الأصل غلط ..

سيد : ايه اللي عملناه احنا وعيالنا .. علشان نطلع من
ظلم لظلم لموت ظالم ..

يوسف : طفيننا النار .. ورقعنا أم محمد منصابة ..
قلنا لهم لأ .. كفاية .. نزلت م السما ..
مشنقة وياها الجلاذ فى الحال ..

سيد : زى ديبحة اتعلقنا قصاد أولادنا ليه ..

يوسف : ليه سلمنا البيه الهلباوى المصرى للخواجات .
الجميع : (تتصاعد) .. ليه ؟

محفوظ : (يصيح) بتسألوا عن ايه لسه .

ادينا رجعنا ورا .. الصورة ملعونة .. من تحت
طاحونة الباشا وكلايه .. لشانق الخواجات فضها
يا محمد .. سؤالنا مالersh جواب .. الدنيا دى
هيه كده ظالمة وبنت سفاح من يومها مجبولة ع السو
.. الشر عفى ودايما بيسود .. وفى لحظة تضيع
بلا أى سبب ولا تسألش ..

(صمت يدور محفوظ وسطهم)

أيامها .. قبل ماتيجى الحادثة بعشرين سنة وأكثر
كنت انتو عيال .. وأنا كنت فى عز رجولتى

وولادى كبار ٠٠ قالوا قامت هوجة فى مصر
ضابط مصرى كبير شرقاوى ٠٠ بييجيب الحق لكل
الناس ٠٠ وجرينا ٠٠ بكل همومنا وغلبنا وشقانا
٠٠ جرينا وقدمنا شكاوى ٠٠ كان واقف راجل
يتهاب ٠٠ هللنا وكبرنا قلنا الدنيا بخير يا ولاد
٠٠ وما كملنا الفرحة الا وصاحبنا مرمى جريح
٠٠ مطرودم البر والخواجات دول دخلوا ٠٠ زى
جراد الصعرا وبالنار ركبوا على نفس الخلق
والبشوات دخلوا تحت بطاطهم واتزفوا لبعض
(صمت) هزينا الروس ٠٠ وقعدنا نمضغ تانى
فى المر ٠٠ أدى هيه الدنيا خسيصة ٠٠ خستها
مالهاش حل ٠٠

زهراڻ : ده كلامك انت ٠٠ لكن فيه شىء تانى أنا
شايفه ٠٠ شايفه (صمت) كنت بشوفه دايمًا فى
عيون الظلمة لما بيوقعوا فى ايدى ٠٠ كنت بشوف
الظلم ضعيف على قد ما هو خسيس ٠٠ كنت بشوف
ف عنين الواحد منهم فار مذعور ٠٠ مستنى اليوم
٠٠ وعارف ان اليوم ده هيبجى ٠٠

سيد : فضها يا محمد ٠٠

زهراڻ : فيه شىء تانى ضرورى أنا حاسه ٠٠

يوسف : نرجع وننام ٠

زهران : مش ممكن دى نهاية الحدوتة •
محفوظ : ما ادينا بنفكر فى اللى جرى •• ايه م اللى
جرى يقولك غير اللى أنا قلته ••
سيد : : (فى نفاذ صبر) •• نرجع •• أنا تعبت تعب
•• تعب ••
يوسف : خلونا نرتاح •• التربة ارحم هنعيد تانى
ونتعذب ليه تانى •
زهران : ايه المانع •
محفوظ : قصدك ايه يا محمد ••
زهران : قصدى نجبهم •• كل اللى كانوا هناك فاتهم
ماتوا ببيجوا ونسألهم تانى ••
يمكن المرة دى نفهم ••
(دقة عالية •• ويظهر بأعلى زناتى فى زى
الموتى بيده عصا كعصيتهم)
زناتى : راح تفهم يا محمد وأنا جيت •• أنا جيت
ياولاد •
المجموعة : زناتى ••
زناتى : فاكرينه ياولاد •• فاكرنى يا يوسف ••
يوسف : عايش يا زناتى •• ولا خلاص مت •

زناتی : عایش ایه یاوله .. أنا مجنون للدرجة ..
دی علشان استنی هناك فی المولد ده ولحد الوقت .
سید : وكأنك یا زناتی عقلت ..

زناتی : وأنا كنت أهبل یاوله .. علشان سيف الزناتی
كان بيخوفكم ؟ طيب .. أهو راح من يوم الحادثة
أهو راح (يضحك) لكن أنا بصحيح كنت أهبل
یابو محفوظ ؟ أنا یا محمد كنت أهبل ؟

زهران : طول عمرك یا زناتی ماكنت أهبل طول عمرك
عنیک بتشوف الی ماحد يشوفه ..

زناتی : زى انت ماكنت تشوف فی الضلمة .. كنت
فاهمنى وفاهمك وأنا بقى یا محمد جيت دلوقت
عشانك . لما لقيتك متضايق وكأنك لسه فی دنيا
الغم (يضحك) وعشانكم جيت برضك یابو محفوظ
.. حاكم الواد يوسف ده حبيبي كنت بمدد دايم
حدا عشه وأسمع تنويحه .. والسيد طيب قلبه
أبيض مع انه كان يضايقنى .. لما أشوفه شايل
طاجن ستة فی الفاضى وفى المليون ..

محفوظ : وجيت ازای یا زناتی الوقت ..

زناتی : ازای (يضحك مهرولا وسطهم) انی یابو محفوظ
ورا قعداتكم من بعد ما مت .. ومش انتم بس ..
أنا زى ما كنت معاكو هناك داير .. داير هنا

برضه .. لفيت على كل الأموات .. ناس ماتوا قبل
.. وناس ماتوا بعدى .. وسمعت حاجات وفهمت
حاجات ياولاد ولا فى الحواديت ..

زهراڻ : ايه الى فهمته يا زناڻى ..

زناڻى : الى بينخر فى نافوخك يا محمد ..

زهراڻ : ايه الى بينخر فى نافوخى .. ؟

زناڻى : (يضحك فجأة) عارف انت الحاوى يا زهراڻ

.. عارفين ياولاد الحاوى .. الى تملى كان بيچى

مولد سيدى شبل الى يحط البيضة هنا (يخرج

بيضة) تطلع من هنا جه ويحط الكتكوت فى العلبة

يفتحها وتطلع فاضيه أو فيها قرد .. أهو بقى

ياولاد البنى آدم ده زى البيضة فى ايد الحاوى ..

يدخل من هنا ياوله .. يطلع م الناحية الثانية ..

وماتعرفش ازاي ؟ عارفين بعد ما ماتوا حصل

ايه .. ؟

مخفوط : حصل ايه يا زناڻى .. ؟

زناڻى : الى دخل من هنا ياولاد .. اتمسح م الناحية

الثانية والكتكوت فى العلبة طلع مش كتكوت ..

وبكده يا محمد راح تفهم ..

سيد : ده كلام واعر يا زناتى ..

زهراى : ايه الى حصل أفهم منه يا زناتى .. قول ..

زناتى : هتشوف دلوقت وترتاح ..

واللى بينخر فى نافوخك هيكى وتهدا حالا دلوقت

نجيب كليت الحلق .. وتتنصب المحكمة من تانى

.. ونشوف ايه الى ورا الحاوى (يندفع الى أقصى

المقدمة) .

(ويضرب الأرض بعصاه فى قوة)

زناتى : (يصيح) محكمة يا ولاد ..

(يضاء المسرح كله .. يصطف فى نصف

دائرة على المستويين بشكل غير منتظم فهمى

ونرجس وأم زهران والشيخ عيسى والهلباوى

وانجليزى ١ وانجليزى ٢ خلف كل منهما خيال

مآتة عله قبعة .. الجميع فى وضع جامد

تماما .. ثمة قوائم خشبية قصيرة فيما بينهم

تحمل طربوشا وقبعة وعمامة ورداء المحاماة

وعبادة وأشياء أخرى ..)

زناتى : (مستعرضا الشخصيات الجامدة) ..

أدى البيضة .. وادى الى أخذها وادى الى
سلقها وادى الى قشرها .. وادى الى قال ..
هم هم ... من تانى كمان يا محكمة (يمر
ثانية بهم) أدى وكيل العمدة وادى الخواجات
ياولاد الى شهدوا والى حكم .. وادى هلباوى
بيه وده واحد ضيف ومهم (شاب) ومعاكم
فى المحكمة دية .. الراجل .. البركة الصبح
.. الشيخ عيسى كبير المحكمة والقعدة ..
خدوا بالكوده بيشوف لبعيد قوى قوى خالص
لف معايا وونسته ..

(يتحرك من الجمود الشيخ عيسى ويهبط حيث
يتخذ مجلسا بين الأربعة) .

محفوظ : أهلا شيخ عيسى ..

سيد : أهلا ياأبا وسلامات .

عيسى : أهلا بكم ياولاد ..

زناتى : (مشيرا لئرجس) ومعانا الزينة يا يوسف
ئرجس ..

(تتحرك من بين المجموعة بأعلى لتتخذ مكانا
الى اليمين. من المجموعة بأسف .. تقدمت بها
السن) ..

يوسف : ئرجس ..

نرجس : سلامات يا يوسف (للمجموعة) سلامات ..
زناتى : (مشيرا الى أم زهران) وأمنا كلنا يا ولاد ..
الطيبة خالص وأميرة أم محمد زهران ..
(تتحرك وتهبط يسار المجموعة بأسفل)
الأم : (لزهران) كنت وحشنى يا ولدى ..
زهران : سلامات يامه ..
زناتى : والوقت بقى .. مفيناش م الكذب ..
عيسى : وهيكذبوا ليه يا زناتى .. احنا فى مملكة
الموت مفيناش م الكذب .. الكل أموات ..
زناتى : لا وراكم هيشة ولا سريشة ولا حد خايف من
حد .. قولوا معايا والله نقول الحق ..
المجموعة : والله نقول الحق ..
زناتى : ولا ح نخافشى ..
المجموعة : ح هنخاف من ايه .. احنا فى بطن الموت
.. والصفحة خلاص سلمناها ..
زناتى : يبقى .. مفيناش م الكذب ..
المجموعة : مفيناش ..
عيسى : يبقى يا زهران .. تسأل على طول ..

زهران : أسأل عن ايه ..
عيسى : ع الى انت ناديتنا عشانه ..
محفوظ : فيه رد ياشيخ عيسى عرفته ..
يغلينا نكن ونرتاح ..
سيد : عذابنا وشقانا العمر ما بين الباشا وكلايه وبين
الخواجات ..
يوسف : وموتنا فطيس ..
زهران : البهتان والزور ..
محفوظ : والرجا والأمل المعدوم الغايب ..
عيسى : (بحسم) كله ده له رد .. مافى شىء فى ملكوت
الله الواسع يحصل .. الا بحساب ..
زناتى : اسألوا .. اسألوا لا الوقت يضيع والديك يدن ..
زهران : (وهو يمر بطيئا) نسأل مين ولا مين ..
زناتى : الخواجات دول أول ..
(رد فعلى الى أراجوزى لدى ذكر اسمهما)
مسخرة نصبوها الخواجات يومها وقالوا محكمة
من مخصصة .. ايه حكايتها ولحساب مين .. والحق
فيها واقف فين بالضبط ؟

يوسف : (يتبعه) والخواجة الندل دمه حط شهادة
ازای ..

سيد : وعرفنا ازای ..

زهران : ولا ح نسأل فهمی الأول ..

(يبدأ فهمی فی الخروج من جموده فی حركة
بطيئة جدا وبألم) ..

محفوظ : فكرت يا فهمی بتعمل ايه ..

زهران : ولا حنسأل هلباوى بيه ؟

(يبدأ هلباوى فی الخروج من جموده فی حركة
بطيئة جدا وبألم) ..

يوسف : ازای وقف ولعنا .. وسلم روسنا هدية
للخواجات ..

زهران : مين أول نسأل مش عارف ! ..

زناتى : (يصيح فى حسم) علشان نلحق قبل الفجر ..
ما يذن .. المحكمة راح تسأل فهمی الأول ..

(يصيح بفهمی) ..

زناتى : فهمی وكيل العمدة ..

فهمی : (ومازال يخرج من جموده فی حركته البطيئة
يرد بصوت خافت بطيء) ما تسألونيش ..

- زناتى : (يكرر بصوت أعلى) فهمى يا وكيل العمدة ..
- فهمى : ما تسألونيش ..
- زناتى : فهمى يا وكيل العمدة .
- (يتكرر ذلك حتى يستكمل فهمى خروجه
ويصيح : ما تسألونيش) ..
- عيسى : يبقى يا فهمى يفكر الخواجات .
(يضرب زناتى الأرض بعصاه)
- زناتى : محكمة يا ولاد (يجرى واقفا أمام انجليزى ١ .
٢ واضعا على رأسه قبعة انجليزية) .
- زناتى : (مشخصا) فهمى وكيل الامده
(ثم يجرى مكمل التشخيص أمام فهمى مرتديا
عباءة وهكذا) .
- زناتى : افندم يا سعادة الباشا الخواجه .
- : تعرف ايه عن دى .
- : بطل .
- : ويعنى ايه بطل يا ولد ..
- : مجرم يا سعادة الباشا الخواجه ..
- : كده حلو .. يبقى كلام الجنرال بوستيك مضبوط
.. كان ماسك واحد عصابه .. عصابه هاجمت
حضرات ضباط ..

انجليزى ٢٠١ : (بالية أراجوزية) ضباط بريطانيا

عظمى ٠٠ لا تغرب عنها الشمس .

زناتى : (يكمل التشخيص) .

(فهمى) طول عمره مناكف مؤذى يابيه بيناكف

حتى الباشا بعاله ٠٠ الباشا أبو شنبات قد البلغة

٠٠ بالك انت يابيه - ايوه ولد -

- : قبلها بشويه ٠٠ كان عامل زيطه وهيصة ولامم

الخلق علينا قال مش عاجبه يابيه ٠٠ قلت له

يامحمد ٠٠ عيب ٠٠ دول ناس كمل خواجات م

الأصلى ومايصحش عيب ٠٠ سيهم يتجبعوا حبة ٠٠

دول خيرهم برضه علينا وأسحاب الباشا ٠٠

فط وجرى من قدامى وناوى ع الشر ٠٠

يوسف : (مشيرا الى نفسه) والواد ده معاه يا خواجه .

زناتى : قلت امسك يا وله ٠٠

سيد : والواد ده معاه ٠٠

زناتى : امسك يا وله .

محفوظ : والراجل الشايب ده كمان وماتنسوش ٠٠

٠٠ كان عند الجرن بيمنعهم .

زناتى : امسك يا وله ٠٠

الأم : (مندفة نحو فهمى الحقيقى) ومسكت قضاهم

٠٠ وحدفته على المشنقة بايديك ٠٠

نرجس : ليه بس يا فهمى .. يوسف الغلبان ترميه
ليه ..

(تدوران حوله وهو يدور)

الأم ونرجس : ليه يا فهمى ليه .. ليه يا فهمى ليه ..
الأم : (توقفه عن الدوران) قول لى يا فهمى ..
قول عن زهران الى ماقلتوش قدام المحكمة يومها
.. قول دلوقت ..

فهمى : راجل .. طاهر القلب وراجل ..
الأم : طاهر القلب وراجل ؟ كده بس يا فهمى ؟
زهران كان حلم .. كان لأمه كابوس وعذاب لكن
كان حلم الناس .. بزمان طيب وكريم ..
زهران : لسه ماشفتوش .. لكن موجود .. رغم
ندالتك ..

الأم : الراجل فيه راجل مرفوع الراس مش مطاطيها ..
سيد : مرفوع الراس مش مطاطيها يا فهمى ..
الأم : مستور .. مطمئن على شرفه وقوته دعياله ..
عيسى : شرفه يا فهمى وقوته ..
نرجس : قادر على حلم صغير .. من حقه ..
يوسف : عش وبقرة .. شبرين م الأرض ..

نرجس : دار تسترني معاه .. لكن خد حلمه وحلمى
وراح .. فاتنى لاجل اترمى وفى ايد أول شارى
.. واتبع رخيص بعده لواحد ميت . له أرض
.. وطن ونسب .. يومها يا نهمى شهدت قصاص
المأذون ع البيعة ..

محفوظ : أدى فهمى .. كلب أجرب يعمل كل ده فينا
.. فين الزمن الطيب بعد ده يا محمد .. ييجى
منين ..

سيد ، يوسف : رد علينا ..

زناتى : رد عليهم ..

فهمى : أرد وأقول لكوا ايه .. انا زيكم مش قادر
أفهم .. كلب أجرب زى ماقلتم غلبان .. ماكنتش
عارف انها راح توصل لكده .. لحد ماشفت قصاصى
قيامه بتقوم ..

زناتى : (بين الانبهار والغضب) قيامه .. قيامه
بتقوم ..

فهمى : ساعتها لقيت نفسى واحد تانى ونازل جب ..
مش هو المؤذى وكلب الباشا واحد مرعوب ..
خش فى لعبة أكبر منه كل عمايلي معاها ولا حاجة .
زناتى : قيامه .. بتقوم ..

فهمى : قيامه وبتقوم .. وراها الخواجات مسمورة
صدقنى يا يوسف .

يوسف : لأ

فهمى : صدقنى يا سيد ..

سيد : لا كذاب ..

فهمى : أبدا ده حصل (يتحرك بطيئا كأنما يرى

ما يصفه) المشنقة والفلكة السوداء خيام الرعب ..

الهبانة وجوه الخلق كيوم الحشر) .. وانت

بهيبتك يا أبو محفوظ (تهبط المشنقة بالخلف

ويتحرك نحوهما محفوظ كالمأخوذ) .

طالع على المشنقة وسط ده كله ولا اتهزيتش ..

شايل سبعين سنة وجرايمى معاك ..

(الارتطام موت محفوظ بأعلى)

فهمى : السما طبقت .. قلبى فى صدرى بقى فحمة .

عيسى : وطلع سيد ..

(يكون قد تحرك سيد نحو المشنقة)

فهمى : وطلعت يا سيد عودك منحول يتهز على المشنقة

يرشق جوايه .

(الارتطام .. موت سيد)

عيسى : فى السما رب كبير ..

فهمى : كنت أنا شايفه ياشيخ عيسى (بعينك مخلوع

من قلبك) ..

عيسى : والصبر جميل لو تعرف ..
 نرجس : وطلع يوسف ..
 (يكون قد اتجه يوسف لأعلى)
 فهمي : يوسف يا غريب .
 نرجس : وحداني غريب سلمته ..
 فهمي : وكأنه ساعتها ضنايا ..
 (الارتطام موت يوسف)
 كأنه ساعتها ضنايا ..
 نرجس : قلنا مفيش كذب .
 فهمي : مش بكذب .. مش بكذب أبدا .. يا زهران
 (يدور حول زهران صمت) ..
 الأم : وانت لما طلعت وراهم كنت هناك عالي أعلى من
 سور الباشا وارتحت ساعتها يا محمد .. وقضاك
 جالك زقه عليك فهمي .
 فهمي : مادد ضلك يا كبير وضلك على كل الخلق الى
 انت حاضنهم طول عمرك وأنا ندل .. آه يا بابا عيسى
 .. السما طبقت واسودت عز الضهر والشمس
 غطيس .. وصرخت يا رب اخسف بي الأرض
 امحيني ..

الثلاثة : (بأعلى يستديرون) بينوح دلوقت ..

سيد : مهما تنوح مجرم ..

زناتى : زى ما كان بينوح يوم الشنق وينف فى كمه
ويتشهنف .. شفتك أنا يا فهمى ساعتها هناك ..

محفوظ : بتدافع عنه كمان يا زناتى ..

زناتى : أنا بحكى الى أنا شفته وانت ماشفتوش ..

عيسى : صبرك علشان تفهم يا ابو محفوظ ..

يوسف : ده ضلالى طول عمره حتى بعد مامات ..
ماينخليش عليكم ..

فهمى : غلبان صدقتى يا يوسف .. صرصار الباشا
ينفخ يجرى قصاده ..

محفوظ : طيب ووصلت لايه ..

زناتى : (يقفز وسطهم بسرعة وهو يخرج البيضة
وتلعب بها ثانية) هنا بقى يا ولاد .. البيضة
خرجت م الناحية الثانية بايد الحاوى .. بالكم يا
ولاد الباشا سلطان اداله بمبه ..

فهمى : وما صدق .. غلطة غلطتها وضربنى بأوسخ
نعل ..

- زناتى : (وهو يرتدى الطربوش وعباءة فهمى) •
- الباشا سلطان الجزائر ••
- (يشخص ممسكا بسوط) •
- فهمى يا كلب يا ناكر الخير •• اطلع بره قوام ••
- ومن الميرى مرفود (يشخص فهمى) يا سعادة الباشا
- امشى ••
- : أنا بدى أشرح لسعادتك بس ••
- : انجر يا كلب •• أصلك واطى وترجع له •• هاتى
- القلة يابت •
- (يتجشأ ويهرش بطنه) •
- واخذ بمبة ••
- فهمى : صرصار وضعيف غلبان ••
- عيسى : أدى فهمى الى انتم فتوه ••
- سيد : مهما ينوح •• ومهما كان الى حصل ••
- سيد : برضه جبان ••
- يوسف : كلب ومجرم •• باعنا ••
- هلباوى : (الذى خرج من جموده خلال ما سبق) أبدا ••
- زناتى : (تقفز) مين اتكلم من غير اذن محكمة فوضى •

هلباوى : أنا هلباوى ..

زناتى : طظ .. لسه ماجاش دورك ..

هلباوى : لازم أتكلم ..

عيسى : سيبه يا زناتى عليه الدور ..

(يهبط ببطء)

هلباوى : فهمى ده لعبه وبائس وكمان هلباوى الى طلب

روسكم .. الى حصل كان لازم يحصل .. اتكلم

فهمى أو ما تكلمش اتكلمت انا أو ماتكلمتش ..

كان ناويين يدونا الدرس ..

زهران : بتدافع عن مين .. عن فهمى ولا بتدافع عن

نفسك ..

الأم : فهمى وهتدافع عنه .. لكن عن نفسك هتقول ايه

.. مجرم أكبر بيه متعلم .. يمكن حافظ كلام

الله ..

هلباوى : حافظه .. واصلى كمان فلاح ..

المجموعة : فلاح ..

زناتى : البيه فلاح ياولاد .. يعنى مسكت الفاس

وعزقت .. قعدت على الجسر وفرشت المنديل

وأكلت المش مع الجلاوين ..

هلباوى : أبويا كان فلاح والفاش ف ايده وماحيلتوش
غير قيراطين ..

زناتى : (يدور حوله) فلاح بيه .. بيه فلاح .. تيجي
ازاى دية ياولاد ؟ ماتلخبطش المحكمة قل لى ..
فلاح انت وبيه ازاى ..

هلباوى : مشكلتى هنا .. وعشان كده اسمعوا الكلامى .
سيد : تسمع ايه تانى ما سمعنا هناك ..
يوسف : سمعنا يومها الى يكفيننا ..
عيسى : اسمعوا لكلامه وللآخر ياولاد ..

زناتى : ماشى بس الأول بقى يا بابا عيسى .. البية
الفلاح دوة قبل ما نسمع له .. نسمع لكلامه وقتها
قدام الخواجات وهو بيطلب رقابيكم (يصيح)
محكمة ياولاد ..

(زناتى يجرى ويرتدى الطربوش)
زناتى : يا محكمة .. هلباوى بيه راح يتكلم واسمعى
لكلامه كويس واستعبرى خالص ..

(زناتى يضع روب الحماماه)
زناتى : حضرات البشوات الخواجات الأصل .. أنا
والله مكسوف خالص وف نص هدومى أقولكوا ايه
.. اذا كان العالم دى لمامة وفضحونا معاكم أخص
والفين أخص واخيه .. ايه بس .. ايه بس ..

ده كمان اكرام الضيف واجب .. واحنا مشهور
عنا الاكرام يا اودم .. ناس جايه تزورككم ..
هادين حلوين زى القشطة هيلموا شوية وز على
شوية همامات ويولعوا شعليلة فى الجرن تدفيهم
همه كدت بيسقعوا فى الصيف ويطخوا لهم ثلاثة
اربعة ع الماشى حصل ايه خربت مالطة .. اخص
عليكو والفين اخص .. ياباى عليكو ياباى .. اعمل
ايه أنا دلوقت .. أودى وشى فىن أنا والبهوات
والبشوات اعمل ايه .. يا محكمة .. يا محكمة
ثلاثة بالله العظيم وعليه الطلاق بالثلاثة ان ماكنت
يا محكمة الخواجات المخبوسة .. تديهم أجدع
اعدام لاكون مموت نفسى الوقت وهنا حالا والسلام
على الخواجات وكل من يغوى الهمامات .

محفوظ : وادينا سمعنا لك ..

سيد ويوسف : اعدام .. اعدام .. اعدام

محفوظ : مش ده كلامك ..

زهران : بس التانى كان مغلى بمية نار .

هلباوى : مش جى أدافع عن نفسى ..

زهران : هتدافع عن ايه .. ده كأنا بينا وبينك تار .

زناتى : (ستراخ التشخيص) ايوه .. بينى وبينكم

تار بالذات الواد ده .. (يشير لزهران) مجرم
.. وحرامى قرارى بأمارة مالمقيتم عنده بقرة
ماهيش ليه .. عند القبض عليه ..
فهمى : كنت آنى .. آنى ..
الأم : جى دلوقت تقولها ..
زناتى : (مستمر مشيرا ليوسف) الواد ده .. دايمًا
متشرد انت ياواد متشرند ولا مانتش ..
يوسف : ايوه .. غلبى كان التهمة يابيه ..
محفوظ : والشيخوخة كانت كافية لاجل ما تطلب لى
الاعدام ..
زناتى : (يشخص هلباوى) شايب عايب ورضى ..
هيجت الخلق عليهم يا عجوز ويا الواد اللص ده ..
سيد : (كانما سينقض على هلباوى) آه لو بعد الموت
موت تانى .
عيسى : صبرك وماتتخطاش .. صبركوا ياولاد محسوبة
.. كل شىء بحساب .
زهران : وخذ الحساب .. وصلت لايه ..
سيد : رقابينا تمنها كان ايه .. باشا .. ؟
هلباوى : (يصيح) تمنها الندم المر .

فهى : الندم المر •

هلباوى : تمنها العار الى ماتفسله كل بحور العالم ••

الأم : طب ليه يابيه ••

عيسى : أنا أقول لكو ليه (صمت) كان فيه سوسة بتنخر
جواه وسط ماكان يقف فى شبابه ويلعن الاستعمار

•• كان بيقول بحماس وحقيقى •

زناتى : (يشخص هلباوى) يانجليز اسمعوا وادخلوا

فى الجحر قوام هلباوى المتعلم ومفتح يسألکم

خدوا بالکم •• انتوا بقى بتضحكوا على مين ••

عايزين آل العالم دية تبقى أوادم تتمد مد •• كهربا

وأزاي بنطلونات خواجهات وحاجات •• على مين

يا با على مين •• انتم حرامية أو نطجية وبلطجية

جاين تسرقوا عرق الفلاح انجر بعيد يا خواجه

انت وهوه •• البر ده لولاده وللـفلاح لاح •• لاح

(يصفق) تسئف تسئف •

هلباوى : قلت كتير •• ولعنت الاستعمار من قلبى ••

لكن زى ما قال الشيخ كان فيه سوسة بتنخر جوايه •

عيسى : ظهرت لما بقيت بيه ••

هلباوى : القوة بتاعهم كانت بتزغلل عينى وفى لحظة

قلت القوة هيه الى بتحکم وانجلترا فى العالم هيه

القوة •

انجليزى ٢٠١ : (بالية) انجلترا عظمى لا تغرب عنها الشمس ..

هلباوى : قدر مش ممكن يتغير .. وأنا وقتها بيه ..
والسكة قصادى ..

زناتى : والبيضة تطلع كتكوت .. والبيه .. لازم
يوصل باشا ..

فهى : والباشا .. كان جنى قصادى بخمسين ايد ..
جنى وسحرنى بسلطانه .. باشا .. اسم يجن ويرعب ..

زهران : ودخلت فى عبه .. زى ما دخل البيه عب
الخواجات ..

فهى : (وهو يتراجع الى مكانه ببطء ليتجمد وهلباوى
يدور) باشا .. اسم يجن ويرعب ..

زهران : (متابعا فهى فى دخوله .. وهلباوى فى
دورانه) سلمتم رقابينا ..

فهى : .. اسم يجن ومرعب ..

زهران : دستم على الناس والأرض والدم الى يجمعنا ..

فهى : اسم يجن ويرعب ..

(يكون قد تجمد ثانية)

زناتى : علشان الغولة ..

انجليزى ٢٠١ : لا تغرب عنها الشمس ..

هلباوى : لكن ما اخدت ثمن .. غير الندم المر والرعب
من العار يقابلنى يوماتى فى كل خطوة .. ف كل
مكان يطاردنى .. يطاردنى ..

(زناتى يشخص هلباوى فى مطاردة مع وحش
وهى) ..

ادونى الفرصة .. اكفر .. قلت ماحدث يسمع
.. حاولت بكل طريقة مريت على كل الناس ..

زناتى : (وهو يمر على الشخصيات مشخصا هلباوى ..
وهلباوى يستمر مرددا خلفه) .. مريت على
كل الناس ..

زناتى : انا هلباوى الندل ..

— : عيل وعملها .. سامحوه يا حبايب ..

— : أيتها قضية بدون أتعاب ولا حتى سيجارة ..

— : أى ابن بلد فيكم له وقفة مع الخواجات راح أخش
بصدرى معاه ..

— : أى ابن بلد مظلوم أو تايه حقه أنا سداد والله معاه

— : حنوا عليه وردوا .. ردوا عليه ..

هلباوى : (وهو يتراجع بطيئا الى مكانه ليتجمد) الى
انكسر انكسر ونزلت التربة وشايل لعنتهم .. نزلت
وشايل لعنتهم نزلت وشايل لعنتهم .. (يتجمد) .

زناتى : (يقفز بالبيضة) زى البيضة فى ايد الحاوى
ياولاد .. تتحط هنا .. تخرج م الناحية الثانية
والكتكوت جوه العلبة .. يطلع مش كتكوت ..

عيسى : فهمى الندل .. طلع غلبان .. والبيه هلباوى
وطلع ندمان .. ارتحت شوية يا زهران ..

زهران : أبدا مارتحتش .. الصورة ملخبطة لسه
ياشيخ عيسى مش عايز اتشفى فى فهمى وهلباوى
.. أنا عايز أفهم كان ايه آخرتها .. كان ايه
تمنه ده كله .. ؟!

محفوظ : (بسخرية) فهمى طلع غلبان والبيه هلباوى
ندمان والخواجات كان فى الأول والآخر ناويين على
موتنا .. لاجل ما مصر تكن وتتأدب وتأخذ الدرس
.. لكن موتنا كان ايه تمنه ..

عيسى : ما تتعجلش .. فى ملكوت الله .. الواسع كل
شئ بحساب .

الأم : طب قول لى ياشيخ عيسى .. ندمهم يعمل ايه
لضياع زهران منى وموت الكلمة الحق معاه ..

نرجس : ندمهم ايه يعمل مع حلم الطيب يوسف الى
اتاوى معاه ولا شفش الضى .

سيد : ندمهم ايه يعمل لعيالى . . ولعيالك يا با .
الى فارقناهم أيتام . .

انجليزى ٢٠١ : (بصوت مبالغت وبنفس الالية) . .
أيتام ايه . . حق ده ايه مين يتكلم . . ده كلام فارغ
. . سميحة بازازة وعزيزة بازازة وطظ .

زناتى : ايه ده . . ايه الى حصل فى المحكمة دوة . .
الخواجات اتهللوا انتو بتتكلموا من غير اذن
وبالفلاحى كمان . .

انجليزى ٢٠١ : اسكت يا ولد . . اسكت يا ولد لما أسياد
العالم يتكلموا تسكت خالص .

(يهبطون على موسيقى القرب اذا تم الاكتفاء
بخيال المآتة يتم تحريكه على صوت الموسيقى) .

عيسى : أسياد العالم . . من هنا راح نعرف آخرتها
لعبهم يا زناتى . .

زناتى : (يقفز فى الوسط) وأدى الخواجات . . عزيزة
بازازة وسميحة بازازة . . الحاوى لعبته جامدة
قوى يا ولاد وياهم . . والى عرفته مع الشيخ عيسى
. . يجن . .

انجليزى ٢٠١ : اسكت يا ولد ..
زناتى : اسكت انت .. وسمع هس .. كله يسمع
للخواجات .
(أغنية الخواجات عن بريطانيا العظمى لا تغرب
عنها الشمس) ..
زناتى : (مع نهاية الأغنية) قال الراوى يا ولاد .. لما
زناتى خليفة صرخ فى الغولة وبعزمه .. الغولة
ماتخضطش .. قادرة وفاجره قام الزناتى كسر سيفه
الحديد .. عيط .. ده كلام سمعته .. وما أعرفشى
صلوا على الهادى واسمعوا الخواجات .. أدى الى
طنخ وقتل والى شهد والى حكم بالموت ..
انجليزى ٢٠١ : مين يتكلم .. وانتم مين ..
زناتى : احنا المحكمة يا خوجة اسمع .
انجليزى ٢٠١ : محكمة ايه يا ولد وفين القاضى ..
المحكمة : الى شنقتوهم ..
انجليزى ٢٠١ : مين فيهم .. ده كتير ..
زهران : الفلاحين فى دنشواى .. والجرن والمشنقة
فى الساحة ..
انجليزى ١ : مجافين .. مجافين .. بريطانيا العظمى
بتتحاكم .. فين المندوب السامى هنا ..

عيسى : احنا فى مملكة الموت يا خواجه •
انجليزى ٢ : برضه مملكة الموت تبقى تبعنا كله تبعنا
•• فين •• المندوب السامى بتاعنا فى مملكة
الموت ••
زناتى : اتكن انت وهوه وردوا •• الفجر هيطلع ••
انجليزى ٢،١ : مجانين •• جرابيع ••
المجموعة : انطقوا ردوا ••
زهران : ما فضلش الا انتم قدامنا لازم نفهم منكم شىء
مش ممكن نيجى ونتعذب تانى •• لازم أفهم ••
أو بعد الموت ده أتجن •
المجموعة : ردوا ••
انجليزى ٢،١ : عايزين ايه الجرابيع ••
زناتى : (يقفز) أنا أقولك يا خواجه انت وهمه
وخدو بالكم •• انت اسمك ايه الأول ••
انجليزى ٢ : جنرال بوستيك يا ولد ••
زناتى : وانت اسمك ايه يا خواجه ••
انجليزى ١ : مستر بوند المدهش يا ولد ••
زناتى : (يرتدى القبعة) القاضى الغول المستر بوند

•• قال للغول الضابط أبو ستيك •• (يشخص)
جنرال أبو ستيك •• مين كان من دول يا حبيبي ••
خضك وشخط فيك بعد ما طخيت المضروبة •• قل
على مهلك وماتتخضش تاني •• قول على مهلك
وماتتخضيش تاني •• قول ••

زهران : وشاورت عليه وقلت دهه ••

الأم : كان هو •• هو اللي شاورت عليه ••

محفوظ : والراجل الشايب شفته بيضرب فيك •

انجليزى ٢ : بطلوا تهجيص (صمت) ايه معنى تكون
انت أو ماتكونش كلكوا تشبهوا بعض •• كلكوا
جرابيع ••

المجموعة : كلنا نشبه بعض ••

الأم : امال اتعرفت عليهم ازاي ••

نرجس : بأى قلب وأى لسان ••

انجليزى ١ : كان لازم حد يموت •• محمد ولا سلامة ••

زناتى : (يمر وخلفه انجليزى ٢) حادى بادى سيدى
محمد البغدادي شاله وحطه كله على دى (يتوقف
عند زهران) •

انجليزى ٢ : (لزهران) انت اخترتك علشان شكلك
زى الفلق طولك أزيد م اللازم وكانك مش خايف
قلت أشوفك أما تخاف ••

زناتی : حادی بادی سیدی محمد البغدادی شاله و حطه

کله علی دی (تتوقف عند محفوظ) •

انجلیزی ۱ : وانت عشان مش خالتي دقتك وکثیب ••

زناتی : حادی بادی سیدی محمد البغدادی شاله و حطه

کله علی دی •• (يتوقف عند سيد) •

انجلیزی : وانت ساعتها كان فيه دبانہ علی وشك وقرفت

•• قلت يغور •

زناتی : حادی بادی (يتوقف عند يوسف) •

انجلیزی ۲ : وانت •• كان شكلك مش بطلال وحزين

قلت هيبقى شكله رومانتيكى علی المشنقة زى

المضروبة جان دارك ••

يوسف : مش ممكن ••

سيد : مش معقول ••

انجلیزی ۱ : أغبيا مجانين •• ايه مش معقول فاكرين

ايه •• محكمة بصحيح أنا جيت لکوا والحکم فى جيبى

متعضر •• والمشنقة قبله بتتعضر •

انجلیزی ۲ : من غير ما اشهد كان ممكن بالقرعة •• لا

وکیل عمدة ولا هلباوى ولا حاجة من دی •• جرابيع

رفى داهيه وشيل ••

زناتى : وعزیزه بازازه وشیل . .
 انجلیزی ۱ : انتم والبشوات والقطن بتوعنا كله بتاعنا
 كله بیسمع ویطاطی . .
 زناتى : وخدیجة بازازاه وطاطی . .
 انجلیزی ۲ والمملكة واسعة وزمانها اتسعت اكثر . .
 اعداء اعدان . . كله لازم یمشى وبالكرباج
 یاتبوظ . .
 زناتى : كله یایکلك هم وبوظ . .
 الأم : والمحكمة والشهود والمحامی والقاضی ؟ . .
 نرجس : والحق یاخواجه . . ؟
 انجلیزی ۲ كلام . . القوة هیه الحقیقه . . یاجرابیع
 . . من غیرها ما فی مملكة ولا سیادة . .
 زناتى : وعزیزه بازازه وزوبه بازازه راحت عليك
 یا خلیفة وانکسر سیفک .
 الأم : (تدور) شئ ینذهب العقل یا ولدی کما موت
 الحیوان رحتم فطیس . .
 نرجس : (تدور بشكل مقابل) ازای یایوسف کنت
 بتدور علی الحب فی الدنیا دی یا یوسف ؟ ماکانشر
 ممکن لو عشت فیها ألف عام دی غابة ملعونة
 ما یخطفی فیها غیر اللئام الدیابة . .

زهران : (يدور وسطهما) لا ده مش ممكن ..
الأم : ازاي يا ولدى بتدور لناسك على الحق فى الدنيا
دى يا زهران .
زهران : أبدا ده مش ممكن ..
محفوظ : شايف وسامع .. شايف يا زهران الحكاية
فضوها سيرة ومش لازم نعود .
عيسى : اوعاكو من اليأس صبركوا بالله ..
زناتى : لسه فيه شى تانى عجيب اللعبة لسه فى ايد
الحاوى .. هاودونى .
محفوظ : خلاص ..
عيسى : ان شفت ماتشسوف كل حاجة يابو محفوظ
اوعاكو من اليأس .. فيه شى استنونى ..
يوسف : (ينادى وهو يتمطى بقوة) خلونا نرجع بقى
كفايه ..
زهران : استنوا ..
سيد : (يتمطى بدوره فى عنف وهو يهبط الى الأرض
وكانما سيدخل القبر) اطلع يا فجر خلاصنا بقى ..
نخلص .. كابوس ..
زهران : لا .. استنى يا فجر .. ماتطلعش أنا لسه
شايف شى تانى .

محفوظ : (يتمطى بدوره ولكن بهدوء وفي انكماش)
ماعدش فيها فضها .. انده على الفجر يا زناتى
لاجل نتاوى ..

زهران : استنوا لحظة .. استنوا لحظة معايا يابو
محفوظ ..

(يدور صراع وهمى لاجتذاب الفجر بالتمطى
والانكماش من جانب المجموعة .. وبالدفع
والدوران بعنف من جانب زهران) استنى
يا فجر ماتطلعش ..

سيد : سبنا يا زهران خلينا نرتاح بقى ..

محفوظ : نرتاح كفايانا ..

يوسف : كفايانا نرجع .. ومش لازم نعود ..

سيد : اطلع يا فجر ..

زهران : استنى يا فجر .. فيه شىء ضرورى ..

المجموعة : (ببطء وشهيق) اطلع يا فجر ..

زهران : استنى ..

المجموعة : اطلع بقى ..

زهران : استنى ..

المجموعة : اطلع بقى ..

انجليزى ٢٠١ : (يقهقهان مع استمرار ذلك) الولد
اتجن ٠٠ مستنى ايه البراءة لو عدتوا تانى ٠٠
هيصدر الحكم من تانى ونشققكم ٠٠
الشاب : (الذى يكون قد تحرك من جموده بأعلى) ٠٠
ده الى مش ممكن وفات ٠٠ لآ ٠٠ استنى يافجر
(صمت)

زناتى : مش قلت لكم ياولاد لسه ٠٠ فيه شىء تانى فى
جراب الحاوى عجب والسيف هيرجع للزناتى خليفة
٠٠ عارفين من ده ٠٠

(تبدأ المجموعة فى استرجاع وضعها الطبيعى
بيط ويهبط الشاب) ٠

عيسى : عارف من ده يا محفوظ ٠٠

محفوظ : مين الشاب ده يا عيسى ٠٠ ؟

عيسى : ابن ابنتك يا ابو محفوظ ٠٠

محفوظ : ابن ابنتى ٠٠ ابن سلامة ٠٠ ؟

(صمت) ٠

ايه الى جابك يا ولدى عالم الاموار وانت لسه
صفار ٠٠ باشا ثانى ؟؟ ٠٠

الشاب : لآ ٠٠ لا باشا ولا بنه يا جدى جابنى شىء أكبر
عذابكو نادانى وجيت بالرد ٠٠ جايب لكو رسالة ٠
محفوظ : رسالة يا ولدى عشانها يموت رسالة ايه ٠٠

الشباب : مكتوبة من بدرى فى عيون زهران وف قلب
شيخ عيسى ..

(يتقدم من زهران)

زهران .. اتصورتك كده بالضبط عود زان
مايلين (يحتضنه) اتعذبت يا زهران ..

زهران : لا الموت ولا المشنقة ولا الظلمة .. لكن
السؤال المر .. ليه .. ؟؟

الشباب : جايب الرد عليه ..

زهران : الرد .. الرد قلت .. بيقول الرد سمعتم قلت
وكدبتونى .. فيه رد ..

الشباب : بسيط .. الرد بسيط .. الدنيا .. ماهيش
ثابتة بتتغير .. ولقدام ..

انجليزى ٢٠١ : مجنون تانى .. مجنون ..

الشباب : متم هناك ودولة الخواجات مادة فى كل الأرض
وأنا مت يا زهران وهيه بتموت وع الآخر ..

انجليزى ٢٠١ : مجنون ..

الشباب : ارجعوا توا بيتكوا وناموا .. واحلموا بالمملكة
الى ما تغرب عنها الشمس ..

انجليزى ٢٠١ : (وهم يجمدون تدريجيا) ما تغرب
عنها الشمس .. ما تغرب ..

الشاب : غربت من بدرى خلاص ..
زهران : ازاي ..
الشاب : الدم .. وعذابكم ودمي .. كان الثمن ..
زهران : الثمن .. تمن العذاب يا يوسف .. تمن
العذاب .. والمر والحيرة يا ابو محفوظ ..
زناتي : صدقتوا الاهبل .. ادى لعبة الحاوى ..
الغولة ماتت .. موتوا الغولة يا اولاد .. الواد يوسف
موتها وسيد .. واني الزناتي ..
الشاب : وبقت نكتة وحدوتة مع الحواديت ..
هلباوى : (الذى بدأ يتحرك ثانية) ماتت ..
الشاب : اتشقلبت من تحت لفوق ..
هلباوى : خرجوا ..
الشاب : من كل البر وم الدنيا ..
هلباوى : مش ممكن وفيها البشوات .. أنا عارف ده
كويس ..
الشاب : مين قالك فيها بشوات .. من قبل الغولة
ماتموت .. كانوا راحوا وراحت أيامهم ..
فهى : (تحرك من جموده) الباشا .. الاسم الى
بيرعب ويجن ..

الشاب : ماعدش خلاص منه ..

محفوظ : ازاي .. ايه اللي حصل طوفان ..

الشاب : أبدا .. انتم واحنا .. دمي ودمك وعذابك ..

زهران : مافضلش غيرنا وذنشواي يا ولاد لساها أهى ..

نساها وابراج الحمام والناس .. وبيوتها والخالع

تعالى يامه (يأخذ بيدها) شيخ عيسى ..

(يأخذ بيده .. يتجهون فى مواجهة القرية بأعلى)

بص معنا بالقاب البصير وافرح ادى هناك دنشواي

نايمة وضرورى نومها الوقت غير النوم .. ضرورى

ليلها الوقت غير الليل .. من غير كابوس سلطان

ولا نبج الكلاب .. ولا رعب من خطوه غريبه

تدهس فى حرمتها .. ضرورى شىء تانى ..

الأم : مش محتاجة لعذابك تانى يا زهران ..

عيسى : شايف يازهران أنا شايف .. شايفكو هناك ..

شايف يوسف ..

يوسف : شايفنى أنى ..

(تخفت الاضاءة حولهم بشكل غير محسوس

وتدريجيا لتتضح القرية سلويت تدريجيا بأعلى)

عيسى : زيك تمام .. لكن فى ايده الفاس نطق ..

نرجس : والحلم يا بابا الشيخ .. الهادى الصغير ..

عيسى : سامعه بيتنفس هوا بحرى .. سامعين معايا ..
الزرع يتنفس كمان .. الزرع فى ارضك يا ابو
محفوظ ..

محفوظ : الزرع فى ارضى ..
عيسى : وعارفك .. زى حمام البرج يا سيد ما هو
عارفك ..

زهران : وزى ما انتوا الوقت عارفين ليه .. ليه العذاب
والمر والبهتان والمشنقة .. كان فيه ثمن ..

زناتى : الله يا اولاد .. شفى كمان والنبي يا شيخ
عيسى .. سيف الزناتى فى ايدى ولا مارجعشى ..

الشاب : فيه حاجة لسه (صمت) السكة مش سهلة ..
أنا مت فى حرب وكسبتها وخسرنا بعدها وكسبنا
تانى .. السكة صعبة ومش سهلة والغيلان أشكال ..

زهران : عمرها ما تياس ..

الشاب : دى المعجزة .. لساها بتواصل فى سكة الأحلام
حلمك يا يوسف وسيد .. نرجس وجدى وأرض
تطرح كل يوم زهران ..

زناتى : (يصيح) الفجر يا اولاد طلع ..

(يستديرون جميعا الى الداخل ويكون السلويت
قد اتضح وانخفضت الاضاءة بشدة ولاح نور
الفجر فى السلويت)

زهران : بيحافر .. وعلى مهله ..
الشاب : شوفوه .. والناس هتصحى تطلع على السكة .
زناتى : سبق الحمام .. أدى حمامه صحت ..
(تدب الحركة فى السلويات حركة الحياة
المادية) .
أغنية الختام .. بعيدة .. ثم تشمل الجميع ..
(النهاية)

مطابع الهيئة المصرية العامة للكتاب

دارم الايداع بدار الكتب ١٨٨٧/١٩٩٠
ISBN — ٩٧٧ — ٠١ — ٢٢٤٣ — ٩